

ASO TOFI, 4 FEPUARI 2021

Na nofoia e le Sui Fofoga Fetalai le Nofoa i le itula e 9:20 i le taeao e tusa ai ma le Tulafono Tumau 27(1).

Tatalo.

SUI FOFOGA FETALAI: Ou te faasilasila atu ua toe amatalia nei Taulumaga o le Fono Aoaio Faitulafono.

E manatu i lenei taeao, e le alu loa se faamatalaga, e ao ona afe e faatalofa ma faafeiloai i le paia maualuga o le Maota i lau Afioga i le Taitai o le Malo, o le Taitai o le Maota lau Afioga i le Palemia faapea foi le Aiga Kapeneta, Sui Minisita, Taitaifono o Komiti Faa-Palemene, ae faapea foi le mamalu maualuga o tupu ma ee o sui usufono filifilia o itumalo aua le tatou galuega fai i totonu o le Maota nei. Ia malo le soifua, malo foi le folau, malo le onosai ma le faapalepale, o lea ua tatou taunuu manuia i lenei foi aso e faaauau ai tatou tiute ma faiva.

E faatalofa atu foi i le tapuaiga a le tatou atunuu i le Le Ao o le Malo ma le Masiofo, e faapea foi le Sui o le Fono a Sui Tofia ma le faletua, le paia maualuga o le tatou atunuu ae faapea foi le paia o le aufaigaluega tofofi a le Atua, faafetai tele i la outou tapuaiga. Malo le soifua. Ia tapuai maia, o lea o le alo lau Palemene i ana galuega fai, ia tatou lalafo laia i le lagi e iu manuia ai faiva o lenei aso.

TULAFONO TAU FAAOFI O LE FAATATAUINA O TUPE FAAOPOPO (NU.1) 2020/2021 – felafolafoaiga faaauau i luga o le faitauga faalua – Aso 12

FOFOGA FETALAI: E tolopo Galuega a le Fono Aoaio i le aso ananafi o lo o saunoa le sui usufono mai le itumalo faa-palota o Gagaifomauga Nu.3, Sui Usufono Tamaitai. O lea ou te tapa le sui usufono mamalu mo Gagaifomauga Nu.3 e tulai mai e faaauau lau saunoaga.

Afioga FAAULUSAU ROSA DUFFY STOWERS (Gagaifomauga Nu.3): Faafetai i lau Afioga i le Fofoga Fetalai mo le avanoa. Ia, e piiama foi lava se lagona i le talosaga molia i lenei taeao matagofie aua le tatou va tapuia ma le tatou Tapaau Sili i le lagi o le o lo o taula i ai le sa o Samoa.

E faatalofa atu i lau Afioga. E faatalofa atu foi i le Afioga i le Palemia, Afioga i Minisita faapea Minisita Lagolago ae tainane foi le paia maualuga o sui usufono mamalu o le Maota.

E faatalofa atu foi i Ofisa Sili o Pulega o Matagaluega faapea Faalapotopotoga, ae a le tapuai mai a Samoa i ona tulaga faalupe, le aufaigaluega tofofi a le Atua, malo le soifua manuia. E faapea foi le tapuaiga a Samoa aoao i ona tulaga faalupe mai mauga tetele seia paia mauga iti.

E maea le Fonotaga i le aso ananafi ua uma le faafetai foi i le vasega foi o Faamasinoga, o le isi lala o Faigamalo Faafetauagai. Ae o nai mataupu ua pau ia te au i le aso ananafi, e ao ona toe faaleoina, o le tulaga lea o fualaau faasaina, ia, o se tuualalo e tuuina atu i le Afioga i le Minisita pe a tusa ai. Pe mafai ona toe iloilo a tatou Tulafono i faasalaga ia i latou o aafia le soifua ma le ola i fualaau faasaina, ia matuai ta lava i luga le faasalaga, faamaualuga lava le faasalaga po o le a le tulaga e i ai, e pei o isi atunuu. O isi atunuu e solo atoa tagata i tulaga ia i fualaau faasaina, ona o i ina e atagia mai ai le tatou faatauaina i le Maota lenei o le puipuiga o alo ma fanau mai aafiaga o fualaau faasaina. Na pau lena o si vaega na paū i le aso ananafi.

Ae o le a ou liliu ifo loa i le matou itumalo. Ou te faafetai i le tapuaiga a si ou itumalo o Gagaifomauga Nu.3. E ui lava o lo o i ai le sui usufono aloaia o le Maota lenei mai le Gagaifomauga Nu.3, a ua faamanuiaina foi le tatou itumalo ina ua ou tulai mai i le nofoa o tina ma tamaitai e ala mai lea i le Tulafono. Ma a na leai lou itumalo e le ausia lenei nofoa. Ma e momoli atu ai le faafetai mo le tou faaeaea.

I le matou afioaga i Sasina, afifio ai e na faasaosao ia Togoia ma lona Aiga, faapea Vagana ma le Aiga Sa Vagana, afio le Matua o Leasi ma le Aiga Sa Leasi ma lou vaa fetalai, malii lo oulua falelua o Saletolo ma Salealiifano. Faafetai atu foi i lau susuga i le faifeau i lau Susuga Panapa ma le faletua ia Leafa, faafetai mo le tapuaiga. E talitonu foi o lena e nafa le tatou Ekalesia ma le fausiaina o le mauga o le Atua, malo le tautua, faafetai le silasila i le Atua ma le tau atiaaina o Lona Malo i le lalolagi lenei.

Faafetai atu foi i le Susuga ia Poasa ma le faletua ia Feao, faafetai le tapuaiga. Le Susuga i le alii Fesoasoani ia Aukusitino ma le faletua faapea foi le Susuga ia Arona ma le faletua. Malo faafetai mo le tapuaiga i lou tulai mai ai e fai ma sui mai totonu o Sasina.

Ia si o matou nuu i Fagaee, le afioaga e afio ai le Sao ia Polataivao ma le Aiga Sa Polataivao, afifio le Aiga Sa Igoa, le nofo a vaega ia Saitupua ma lau fetalaiga Nu. Faafetai i lau Susuga Afatia ma le faletua, e moni o lo o fou atu foi lou sa i totonu o le tatou afioaga a o lo o matauina pea le sologa lelei foi o le tausiga o le lafumamoe i totonu o Fagaee. Malo faafetai.

Ia, si o matou nuu i Letui, afifio ai le paia o Aiga, le nofo a Ituaiga ia Fatua ma le Falelupe, faapea lau fetalaiga Fiu, tainane foi le fetalaiga ia Sufia o le o lo o tausia le nuu i lenei vaitau. Faafetai atu foi i lau Susuga Isaako ma le faletua ia Vina, e moni foi o lo o faataotolia lau Susuga i mai o le tino, ae

talitonu lava e toe foi lava lau Susuga i le tausiga o le tatou Ekalesia i Letui. Malo faafetai mo galuega lelei i totonu o le tatou afioaga, aemaise lava o le tau tapueina lea o le tupulaga talavou i totonu o Letui. Faafetai mo le tapuaiga. E faafetai atu foi i le Susuga ia Michael ma le faletua faapea le Susuga ia Fuliese ma le faletua, tainane foi le tapuaiga a le Susuga ia Tutoatasi ma le faletua.

Ia, si o matou nuu o Aopo o lo o faafogafoga mai, faafetai tele lava i le tou faaeaea, faafetai i le tou amanaia o lou nei tagata ua mafai ai ona maua se sao i totonu o le Maota o Samoa. O le afioaga o lo o afio ai le Matua ia Eetau ma le Ati Eetau faapea Tauaanae ma Matofai. Susu le Suafa o Faaulusau tainane le paia o le Aiga Sa Umamoa. Eetai lau fetalaiga Pao ma le mamalu o le Falelima o Saeseese faapea le Tapaau o le Tagalooaopo.

Faafetai i lau Susuga Penaia ma le faletua Ianeta, faapea foi lau Susuga Sosene ma le faletua. Faafetai mo le tapuaiga. E mafanafana lava le galuega o lo o faatinoina i totonu o le Maota leni talu mai le amataga o leni Paeaiga, ona o lo o talitonu o lo o tapuaia faiva o lo o alo atu i ai. Faafetai tele lava mo talosaga molia, faafetai mo le tapuaiga.

Ia, o le tulaga i le tatou Tala o le Tupe, e lagolagoina e lou sui usufono le tatou Tala o le Tupe. O se lagona lava e toe faaleoina ai le agaga o le faafetai i le tatou Faigamalo, i lau Susuga i le Minisita o Tupe mo le faasoasoina o tatou seleni aua le faatinoina o le auaunaga i si o tatou atunuu ma e lagolagoina le tatou Tala o le Tupe ua i lumamea.

E faapea foi ona momoli le faafetai tele lava i le Komiti foi lea o Faalavelave, o i latou lea o lo o nafa ma le puipuiga o Samoa, front line workers a le NEOC, o lo o latou puipuia le faamai aua ne i oo mai i totonu o laufanua o Samoa. Ma e talitonu foi le agaga e pei ona faaleoina e fetalaiga ma saunoaga ua tea, e le faigofie, e lamatia ai le soifua o i latou, a ua silasila alofa i le tatou atunuu ina ia malu le puipuiga mai leni faamai. Malo faafetai mo le tautua, faafetai le alofa ia Samoa.

Ia, e ao foi lava ona faaleoina le agaga o le faafetai i le Afioga i le Fofoga Fetalai ma le Taitai o le Maota i tofiga sa valaauina sa tofofi i ai i leni Paeaiga ua tau faaiuu. E matauina foi lava e lou sui usufono le amanaia o le nofoa leni o Tamaitai, ona o le tele lava o Komiti Faapitoa, sa auai lava lou sui usufono i Komiti nei ma le filifilia o le nofoa leni. Ma e momoli atu ai le faafetai tele lava i lo outou amanaia.

Faafetai i le Taitaifono o le matou Komiti o Atinae Tetele, le Afioga ia Tafua, faafetai lava le faa-toeaina i le taitaiga o le tatou Komiti. O le tele foi lava o le aoaoga ua maua i leni Paeaiga, o le faasoai mai lea o i latou Sinia o le Maota. Faafetai lava i le amanaia foi o ni fautuaga.

E faapea foi le Afioga i le Taitaifono o le Komiti Faapitoa o Tulafono na se i mavae atu nei na pasia, le Afioga ia Gatoloai. Faafetai mo fautuaga, malo foi le fai o le faiva i le taitaiga o le tatou Komiti i luitau sa feagai ai, ae na mafai lava ona faafoefoe lo tatou sa e lau Afioga. Malo lava le lototoa ma

le lototele i le tele o luitau sa tatou feagai ai, a o luitau foi ia sa faapena ona faatuputele ai le faatuatua.

Ia, ua maea lau lauga, sa ou faapea e i ai nisi e faauilavea i lenei taeao, a o lea ua vaavaai atu e leai ma se isi e toe fia faauilavea i se faamatalaga. Ae faafetai lava mo le faaaloologia o lou sa i lenei taeao.

Ia, ona faaiuina ai lea o se faamatalaga i le vivii ae o lou loto i le Alii, olioli lou agaga i le Atua lou Faaola, aua ua silasila i Lana auauna faafine ua amanaiaina. Manuia le Fonousu a Samoa.

Na faaalua le agaga fiafia o le Palemene i le patipati o latou aao, i le maea ai o le saunoaga a le sui usufono mo Gagaifomauga Nu.3.

SUI FOFOGA FETALAI: Ia se i tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, sa le faalavelave i le saunoaga a le sui usufono ona pau lenei o le tamaitai sa ulufale faapitoa mai lava, na to i ai le matupalapala o le Tulafono. A na leai la le Tulafono lena, e le sao mai i totonu, ma avea ai ma le avanoa faapitoa e 2 ai sui usufono o Gagaifomauga Nu.3. O lea la sa leai se taofi e faalavelave i le lauga, e i ai nai mea tutua lava e 3 e tataua ona ou tali atu i ai, a o ala le mafua i finagalo, e le gata o sui usufono ae faapea foi le faafogafoga mai a Samoa.

I le taimi faatoa ou sau ai i totonu o le Maota lenei, o le faiga sa fai, afai lava e 4 vaiaso o talanoa le Tala o le Tupe, e tau leai lava se sui usufono e faalavelave, e alu lava le lauga ia. Po o le a le matuia o le lafoga, e nofonofa lelei Minisita e leai se isi e tali. E pei e i ai le agaga foi lele e ave le faaaloalo, a o totonu o le faaaloalo lena, o lea e afifi ai ma isi faaletonu e tele. Aua o aso na, e le taofiofia le tu mai lava o le isi sui usufono ma lau le gaofi o le Minisita. A le tali la le Minisita, ia manatua o la e faafogafoga mai le atunuu i le 2 po o le 3 vaiaso lea ua alu le talaiga, ua outou faalogo o lau le faaletonu o le Minisita lea? E toe lauga atu le Minisita, ua soo atoa Samoa i ona viiga. E toe faasao atu foi, ua ese tagata ia e faalogologo mai, a ua le faalogo mai tagata sa faalogo muamua i le taimi sa alu ai le lafoga matuia.

O le ala lena na faavae ai le faaiuga a le Vaega Faaupufai lenei, na pau lava le mea e tataua ona fai, o le alu loa i le Tulafono tuai tuai lava, faasao le uamea pio a o vevela. O lea la, e oo foi i le mea fia faasao ma le mea e fia faamalamalama, o avanoa ia ua tuu mai e le Tulafono Tumau lau Afioga i le Fofoga Fetalai, e mafai ai ona faauilavea le sui usufono. O le tatou Tulafono Tumau, o le mea e fia faasao po o le mea e fia faamalamalama atili. A o le Malo la, o le Malo e tatala lava le avanoa. Aisea? Leaga o le Malo, o le Kapeneta lea e faataoto atu ai faiga faavae. A oo la ina fesili, e tele ina le malamalama le Maota, e moomia se faamalamalama a au nei ma le Aiga

Minisita, leaga o i lea e faataoto atu ai faiga faavae ma atinae o lo o fai. E faapena foi la mai lava i le 2011, omai pea omai pea omai pea leitio ma TV e fesili mai ia te au po o Minisita foi po o Ofisa Sili o Pulega o Matagaluega e avatu le faamalamalamaga, leaga o i lea e i ai le faamalamalamaga e sao, o faiga faavae a le tatou Malo e mafua ai lea atinae, e mafua ai le teuteuga o lo o fai i lea Tulafono ma lea Tulafono.

O le uiga o lea mea, afai la e gasolosolo mai leitio ma TV 2011 i le amataga ia Fepuari ae toe o ni aso fai le faiga palota e tau mai lava i le taimi lenei, o mea fia faamalamalama lea e omai ai leitio ma TV, o mea e fia malamalama ai i lea atinae ma lea atinae. O le ala lena e ala ai ona fai pea fai pea fai pea le omai pea ia te au po o Minisita foi po o Ofisa Sili o Pulega o Matagaluega, ma o le upu lena, o le tuualalo lena a le Malo ia i latou uma o Ofisa Sili alii ma tamaitai, se a o atu ea i latou nei o TV ma leitio faapea foi ma nusipepa, faaavanoa so outou taimi e ave ane ai faamalamalamaga ma faasaoina ai le toe omai ia matou nei. O le ala foi lena ou te vaaia pea vaaia pea nisi foi o Ofisa Sili o Pulega o ave tali. O lea la e faafogafoga mai nusipepa e le o taofiofia e au ma le Kapeneta faamatalaga. O le faanaunautaiga lea o le Malo ia faasalalau faasalalau faasalalau ana galuega e fai. Aisea? Leaga e faalagolago uma lava galuega uma i le policy tauave a le Malo i Tulafono e 2 o le Good Governance. O a Tulafono e2? Ia manino mea uma. Faamanino mea uma aua ne i i ai ni mea e faalafi.

Lona 2, ia matua manino foi le faagasologa ma le faatinoga o galuega ina ia mafai ona sue maua tonu lava le tagata o lea e mafua ai se pio pe mafua ai foi se mea lelei ua fai, ia iloagofie. O lau lena faa-Samoaina o le upu lea o le accountability ma le upu lea transparency.

Lau Afioga i le Fofoga Fetalai, o le itu taua lena sa ou tulai atu ai e fia faamalamalama lelei itu ia, o le avanoa lenei e faafogafoga lelei mai ai le tatou atunuu i tatou faatalanoaga, aua e oo foi i mea ia o le tatalaina o auala faapea foi ma galuega, e tasi lava le mafuaaga lea sa ou tulai atu ai, afai tatou te talitonu o mea uma tatou te fai na ona tatou fuafua a o le Atua e faatinoina, ma upu foi o lo o aumai i le Salamo, e leai se galuega e mafai ona fai pe a na leai le Atua, e le mafai ona fai. Lea e aumai i le Salamo. O le Salamo i lona faaupuga, “Afai e le auai le Atua i le fausia o se fale, e galulue fua i latou o e atinae. Afai foi e le auai le Atua i le leoleoina o le aai, e matamata fua i latou e leoleoina.” O le Salamo lena na tusia i le taimi na faatoa faafoi mai ai e Kuresa le Emeperoa (Emperor) o Peresia i le 20 tausaga muamua na oo mai ai, faataape le nuu o Isaraelu ma matua talepe ma le temple po o le malumalu lea o le Atua i totonu o Ierusalema, ave uma le ario ave uma le auro. E 20 tausaga na mulimuli ane ai, talu ai le maoae o vavega ua faia i ana miti ma faamatalaga na avatu ma le faatinoga e sao lelei na gau ai le loto o le tupu faapaupau lenei ma faapea ane, “O le Atua o Isaraelu, o le Atua lea o le lagi ma le lalolagi.” Faatonu loa ma i latou la nei o Perofeta e toe foi, ave uma lava mea ia na tatou aumaia toe aumaia, toe fau le malumalu i

Ierusalem, leaga ua talitonu o le Atua, o le Atua o le lagi ma le lalolagi. O le a la le mea lea na tupu? E foi atu i o e fau, o ane isi e fia fesoasoani, ae teena latou ia, teena. Ua pei o ni tagata ese tagata la, e le i fiafia le Atua i le mea lea na fai. A o le finagalo o le Atua, faaauau le galuega, lea na mafai ai ona faaauau. Aisea? Leaga na o le loto mama o i ina e fia afio ai le Atua ma le alofa lea e faavae ai Tulafono ma le au Perofeta. O le ala lena e le i fiafia ai le Atua i le mea lea na tupu, ma o i ina na tusia ai le Salamo lea. Pe a le auai le Atua i so o se atinae e fai, e le taunuu i se lelei. E ao ai ona agai le Malo. Ua fia nei tausaga o fai? Mai lava i le taimi o tulai mai ai le HRPP, o le mea lava lea e fai, e o e tatala galuega, ae i ai le faifeau e faia le lotu o le faafetai. Aisea? O lea e aumaia lava i Afioga a le Atua le Salamo. Pe a le fausia e le Atua se atinae, e galulue fua i latou. E le o ni faatosina lau Afioga i le Fofoga Fetalai, na fai mai lava i le taimi na tulai mai ai le Vaega lenei ma tua atu i Nofoaiga foi i tua atu.

O le mea la lea e fai nei e le Faigamalo lenei ina ia malamalama lelei pei ona saunoa le sui usufono i atinae o lo o faatino, o atinae e tataua ona sii ae le Viiga i le Atua ma le faafetai, aua a na le seanoa Ia, e le mafai ona faatino galuega o lo o tatou faia. Ona ou agai mai ai lea i le vaega lenei o lipoti, o lea sa taua manino e le sui usufono. E taua tele le mataupu lea na ia aumaia, o lipoti. O lea e aumai manino i lana saunoaga, o ia lea e saofai i totonu, saofai i totonu o Komiti. O au, e le i maua se avanoa ou te saofai ai i totonu o Komiti nei, o lea e fai ai galuega ia, e le i maua sou avanoa. Aisea? E leaga na ona tofi lava o au e avea ma faipule, tofi loa ma au e avea ma Minisita, e leai lava ma sou avanoa ou te saofai ai i totonu o Komiti. A o Komiti ia, a fia iloa e se sui usufono galuega uma tau le Malo, o i i Komiti ia e taua tele. O i e fau mai ai lou malamalama i galuega uma ia e faatino e le Malo. Aisea? E auai uma atu lava lipoti nei, o atu ma Ofisa sili o Pulega o Matagaluega, faamatala auiliili le mafuaaga o lea galuega ma lea galuega, lea Tulafono ma lea Tulafono. E uma ane le Nofoaiga a le sui usufono ua matua polofesa i tulaga uma. O gaoiga e faia i totonu o le Malo, ma ua lava tapena ai foi ma latou e saofai i totonu o le Kapeneta, aua le faafeagai ai ma fuafuaga fai a le Malo i le lumanai.

Lau Afioga i le Fofoga Fetalai, o le a le upu lea na saunoa i ai le sui usufono. E faafetai atu i Ofisa Sili o Pulega o Matagaluega, i le tele o la outou galuega o lo o fai. Ma o lea e atagia mai, ua up to date uma lava lipoti, aofia ai ma lipoti a Suetusi ma lipoti o le tupe. O a mea o lo o tutupu i taimi faatoa ou sau ai, e oo lava i le 15 tausaga e le i oo mai ia lipoti a isi Matagaluega, aemaise le lipoti taua lava lea, o le lipoti o tupe i le faagaoioiga o le Malo ma tupe na faaalu ma tupe na maua. O lea la ua saunoa le sui usufono, e aumai ai lana faafetai. O le mea ou te fiafia ai, o le aumai o le faafetai, a o lea e saofafai i totonu o le Palemene, ia Ofisa Sili o Pulega o Matagaluega, e agai tonu lava i ai le upu o le faamalo. Faamalo galue, faamalo le tautua atunuu, i la outou galuega o lo o faatino, o lea foi e aumai i totonu ma lava

taoso ai ia outou o sui usufono mamalu o le Palemene. E faafesili mai e le Kapeneta i lea mea ma lea mea. Aisea? Ua loloto lo outou silafia ona o lipoti o avatu ma faatalanoaga na fai. E le o toe i ai nisi e aisili, o latou ia o lo o fautuaina le Malo, o lea foi ua o atu e faafeagai ma outou. O tupu ma ee o le atunuu, e ave ane ai fesili ma avatu foi a latou tali, i lea mataupu ma lea mataupu, ma atili malamalama ai mea o lo o faia e le Malo ma faatino ai Tulafono o lo o limataitaiina ai le Malo, transparency and accountability. E leai lava se mea o faalafi, o le tulaga foi lena o fautuaga, o lea e fai pea fai pea e le Kapeneta i le taimi, e taitasi ona fonu i le 2 masina. O le Kapeneta atoa faatasi ai ma Ofisa Sili o Pulega o Matagaluega, ma nisi foi o outou o sui o Minisita e valaauina, e saofafai ai i totonu o le Fonu lea. Ae talanoa matou ma Ofisa Sili o Pulega o Matagaluega, po o fea le mea ua oo i ai le faagaoioiga o atinae. A o le a foi le faafitauli o faafeagai ma i latou, ae tuusao mai ae tali atu Minisita i le galulue faatasi.

Lau Afioga i le Fofoga Fetalai, e tasi lena auala taua tele o lea e faatino ai galuega a le Malo, o Lipoti ina ia uma atu lea tausaga ma vave mai. Ua ou tautala soo lava i le mea lea, o le a le aoga o lipoti e toe aumai, ae ua 3, 4 tausaga ua tuai ai, ua uma ua le toe aoga? Ae ala ona tataua ona vave ona aumai lipoti ina ia lava taoso ai ma faaauepega outou o Minisita Lagolago faapea foi ma outou Afioga o sui usufono, e silasila po o a faaletonu, aua o le tatou galuega e fai faatasi. A fai o le a la outou silasila e faaletonu se mea i lea Matagaluega ma lea Matagaluega aua le oti i tua le taofi, aumai, aumai i luma, o le tulaga taua lena o le saunoaga a le sui usufono. Na ou manatu e le tataua lava ona gugu le Malo i mataupu ia, e tataua ona avatu le faafetai i le sui usufono, i lona aumaia malamalama o le fatu o le faatinoga o galuega a le Malo. O le fatu o le faatinoga ma le vaaiga o galuega a le Malo, o galuega a outou o Komiti, sui usufono o le Palemene, tou te sailiilia. Ma o le ala foi lena, o lea e taua tele ai le mea na fai e le tatou Vaega, ua leai se Itu Agai, ona o le finagalo o Samoa, lea na fai ai tofitofiga, o le a avea outou e le o umia ni tofi Minisita ma ni tofi Minisita Lagolago. O le a tofia e avea ma itu a le tatou lava HRPP, e toe agai mai matou. O lea e molimauina, e oooo lava i saunoaga a sui usufono, e le o milimilia faauu ia upu, ma e le tau faamaonia ia upu. Aisea? O lea lava e faafogafoga mai le atunuu, i tatou felafolafoaiga o lo o fai nei i totonu o le Maota.

O le Vaega lona 2 lau Afioga, o le itu lea sa agai i ai le sui usufono, ua le o toe sioki ia oloa, e sao. Aua e le o toe sioki, e oo lava i le taimi lea tatou te faamaia ai, e leai lava se mea e tataua ai ona sioki. Aua o i ina tonu lava na tuuaunoaina ai le Faiga Faavae a le Malo, o le a faaalu pea vaa, sau pea vaa, ina ia aua ne i motusia le sapaalai o oloa o lo o manaomia. Ae i ai le taimi na tau sioki ai ia mea ia o moa, se i tulou, e oo foi la i laupapa ua tau sioki foi laupapa. Aisea? Ua tele naunau, o le mea lea e maofa ai atunuu i fafo i le faafogafoga mai, i le alu o atinae lea e fai nei, o le fausia o fale. I le tele o tama fanau ua foi mai ma seleni, i le tele o fale o lea e fausia, o le taimi e le

tatau ai ona fai ni galuega faapea, a o le mea lea ua alu nei. O le matua tele o fale lea e faagasolo, ua out atoa ai, o lona uiga, o le faasologa o oka a Kamupani, i le latou lava faamasinoga, o le mea masani, o lea la na tau sioki ai. Ma o lea lava e sau vaa, o lona uiga, ua faaletonu la latou vaai mamao, i le televave tele o le alu a le laupapa, i le maoae o fauga fale ia e fai nei, ona o le tele o seleni lea e maua mai. E latou foi na tofia e o i fafo i galuega ia sa saili e le Malo i luga o aiaiga ma faatalanoaga ma le Malo o Niu Sila faapena foi ma le Malo o Ausetalia.

Ona tau agai ai loa lea o manatu i laau a le atunuu lenei, ina ia mautinoa, o lea e i ai le tapu i le taimi nei, se i tau fofo muamua le mea lea, le faafitauli lea e tupu mai i le tuaoi o Aopo faapea foi ma isi nuu ia e pei o Sasina. E i ai le latou fevesiaiga ona o lo o i ai le iuga o le Faamasinoga ua tosi ai le tuaoi. A o le mea lea ua tupu, ua ta faasolituaoi ia uta i le vao. O lea la tuaoi e faitioina e Aopo isi, e faitioina foi e Sasina isi, ona ua leva ona manaomia le fuatia o le tuaoi. Ua uma ona fai faamasinoga. I le matou feiloaiga ma afioaga nei e 2, Fagaae ma Letui. Na tautino mai ai e afioaga nei, ua 30 tausaga, o feagai i latou ma le faalavelave lea. A o lea e le i maua lava se fofo, na fai le matou talanoaga lenei i le masina o Novema lea na tea atu nei. O lea e i ai le Faiga Faavae a le Malo e tali atu ai, o lau tali i ai. A na aumai le mataupu lea i luma o le Kapeneta, i le 10 tausaga talu ai po o le 20 tausaga talu ai, ua leva ona to lo outou matupalapala.

A o uiga ia lau Afioga o mea nei o galuega, e alu atu taumafai lava le Ofisa Sili o Pulega e fai se tonu mo le foia o faafitauli, e aumai e itumalo ma le Minisita, e faatalanoa e latou. A i ai loa se faafitauli ua le mafai ona foia, sau loa i luga i le fale paepae, i luga i le Kapeneta. Ona alu atu loa lea i luga i ina o le tonu. A na vave oo mai le mea lea ia te au, ua leva ona maua le fofo, semeamanu e le 30 tausaga e faatali ai, a o lea faatoa oo mai ia te au, i le masina o Novema. O lea la ua uma, ona faasalalau o le a fua, fesoasoani ai le Malo, ae te i foi ua toe tulai mai isi feeseeseaiga. Na ou valaauina le fono i le vaiaso talu ai, ma o lea la ua taoto i paga le faamoemoe mo le faaauuina o le galuega.

I le tulaga o le puipuiga o mea nei o le taina o le vao, o lea ua tapu ai le toe aumaia o ni laupapa mai Savaii i Upolu i luga o le vaa. E faigofie lava ona faaauu pea ituaiga uiga ia faasolitulafono i le vao lea i le tuaoi o Sasina ma Aopo, pe a tatala uta nei, i laupapa i le vaa. E mafai lava ona sau le isi ma faapea mai, e leai o matou laupapa ia e sau mai Salailua. O lea la na fai ai lea o le iuga, e tapu le toe aumaiga o ni laupapa mai Savaii, se i maea lelei le galuega. E i ai le taofi, po o le faaiuga o Mati po o Aperila, e tatau ona oo atu i ai ua maea, ona toe tatala foi lea, ae se i tilotilo muamua le Matagaluega, po o le a le tulaga o i ai le vaomatua, aua le puipuiga o lo tatou siosiomaga, ma lo tatou sao i le tulaga lea o le taofia o le fesuiaiga o le tau. O le mea lea ua tatau ona tilotilo lelei ai i ina, ona o Samoa o le isi atunuu o lo o i totonu o le lio o atunuu, na sainia le feagaiga i Palisi. Sa ou sainia le feagaiga lena,

i le 2015, atoa uma i ai ia atunuu o le lalolagi. Aisea? Ona o atumotu e muamua lava ona faatamaia, e muamua lava ona magoto i lalo atumotu, pe a fai ae le faia se faiga i le mea lea, o le taofi o le suiga o le tau. O le uiga la o le faamalalamalama lea, mo i latou o lo o i ai le faamoemoe. E leai e le o se tapu, na o sina taofiga, se i mafai ai ona faafilemu feeseeseaiga ia a nuu, o uiga na o le Malo. A aumai se mataupu i le Malo, e faia ana faaiuga ia fesoasoani i le tausiga o le filemu, ma le va nonofo i totonu o afioaga e alii ma faipule. Ia faatumau pea le loto lelei, aua ne i fetaai, ae se i liliu atu le Malo e faatino lana matafaioi o le fofu lea o ni faaletonu e tulai mai.

Lau Afioga i le Fofoga Fetalai, o le isi mataupu o le itu lea o Tulafono ia sa saunoa i ai le sui usufono, ua tatau ona matua tuu i luga tau. E le o se taimi muamua foi lenei, ia le tuu i luga, le malosi o faasalaga. E le o se taimi muamua lenei ua ou talanoa ai i le matupu lenei. O lea e faafogafoga mai le Loia Sili, ma ua tele foi ona ou talanoa i isi loia sili muamua atu. I le finagalo o le Palemene, ua leai nisi o toe aisili, o lea e i totonu iinei tupu ma ee o Samoa. E tatau ona mataitu le tulaga lea i sala, leaga o le mama o le sala, e uunaia ai le fai pea le fai pea o le soligatulafono. O le faalavelave o le mea lea e alu ai tatou, e tusa pe miliona le sala. Ae o le faaupuga lea e i ai faale-Tulafono, e oo i le miliona le sala. O le oo i le miliona le sala, e amata atu lava i le leai o se sala, \$1 seia oo i le miliona. O le faaupuga lea e manao i ai le Malo, ia le i lalo ifo o le miliona, e na o se faataitaiga, ia le i lalo ifo. O lona uiga, o le miliona agai atu i luga, a o le mea lea e alu ai Tulafono. E fai mai le faaupuga o le Tulafono o mea e masani ai Tulafono a Malo. Ia le sili atu i le fia 100,000 o lona uiga e amata atu lava i le leai, leai o se sala. Ae i ai faaiuga ua tulai mai, ua matua popole ai lava le Malo, faapea foi Matagaluega o le Loia Sili. O faaiuga e tatau ona toe tilotilo i ai le Faamasinoga, e tatau ona tilotilo lelei i ai le Faamasinoga. O lea sa aumai ai pea le tuualalo a le Komesina o Leoleo.

O le puipuiga o Samoa, o leoleo lava e pito lamatia lo latou ola, e pito lamatia lo latou ola. Ae pei ua faataaloga i vai e nisi, e le o Faamasino uma. O le avatu lava o le mataupu a lea, bail, avatu le mataupu a lea, bail, o lona uiga, e faamalalo mai i tua ae matua matautia le solitulafono na fai. O lea e tagiuu ai le Komesina o Leoleo, aisea? Leaga o le exposure foi lena o le lamatia ai lena, o le ola o tupu ma ee o fanau a Samoa, o lea e i totonu o le Matagaluega o Leoleo, o lo o latou vaaia le saogalemu o le atunuu lenei. E tatau ona matua vaavaai lelei i ai Faamasino ia latou faaiuga. O le ala foi la lena, a alu atu i totonu o le Maota lenei ia saunoaga faapenei, o saunoaga e sau mai le atunuu. E tatau ona faafogafoga lelei i ai ia Faamasino, e le faapea e ave ane le umi o le latou tofiga e soona fai ai ni faaiuga faapea.

O le mea la lea, o le tali atu i le mataupu lea na aumai, e taua tele le lagalaga mai o manatu o le tamaitai sui usufono. E toe faamanatu mai ai pea, ma toe faamanatu mai ai pea, ona o le natura lea o le soifua, seiloga e faaselau ona

laga mai, ona faatoa gaoioi lea o mafaufau o isi i le tulaga faapea. ma talia gofie ai.

O la e faafogafoga mai le atunuu, i le matautia o le mea lea e tupu, i le faigofie ona faasaoloto le pagota, ae matautia ana mea na fai. Ona o le Tulafono e mafai ona faasaoloto a o faatali ai lana faamasinoga. O lea la ua agai i le aia tatau toatasi a le pagota, ae le o vaai i le aia toatele a tagata e toatele, e ono aafia i le matapu lea. O le mataupu lea o le alu atu o le tagata limatete i tua, ua tatala atu, ona alu atu loa lea faatino ia se isi soligatulafono, e sili atu ona maoae. O ai la e faitio? E agai i Leoleo, agai i le Minisita o Leoleo agai mai i le Malo, a o lea e faatino le galuega o lo o taumafai i ai le Malo. Ae faamalo le faatupu manatu, o manatu lelei mo le puipuga o le tatou atunuu. Lau Afioga i le Fofoga Fetalai, o lau fesoasoani atu, na ona toe faamalamalama mataupu ia, a o lea o lo o ala pea le mafua o le taeao, i le faafogafoga i le saunoaga a le tamaitai sui usufono, a o lea foi e faafogafoga le Kapeneta, faafogafoga ia le Ofisa sili o Pulega o le Matagaluega o lo o nafa ma mataupu tonu lava ia, o lea e lagalaga mai e le tatou Maota nei.

Lau Afioga i le Fofoga Fetalai, ua umi le faamalamalamaga, ae o le faamalamalamaga e tatau ma onomea, e amata ai le tatou galuega i lenei taeao, soifua ma ia manuia.

SUI FOFOGA FETALAI: Ua faamalo saunoa i lau Afioga i le Taitai o le Malo. O le upu moni lava e sala ina umi, e le uma le fia faalogologo aemaise le Maota lenei ma le faafogafoga tapuai mai a le atunuu. Aua o mataupu e taua mo le soifua manuia o le lautele o Samoa. O lea foi sa fia oo se faamatalaga a le Nofoa e momoli ai le faamalo ma le faafetai i le sui usufono mo Gagaifomauga Nu 3. E tusa o le tapenaga ma le lauga, o le aso ananafi seia oo mai i lenei taeao. Ua faafogafoga le itumalo, ua faafogafoga Samoa.

O le matau a le Nofoa, ua le tasi, ua lasi au fautuaga, ou te manatua lava le 2016 na tatou i ai i le Komiti Faapitoa, o le tele ia o au fautuaga. O le faailoga lea o le tagata ua tofia e le Atua, aua le faiva lea, faa-sui usufono, o la e faafogafoga mai le itumalo. Ou te le selu atu lau Afioga i le sui usufono mamalu, o lea foi ua oo i le taeao nei, mai le aso ananafi seia oo mai i le taeao nei. O lea ua matua atoatoa ua fusi le fau o Malo, i le atoatoa o le faamaninoina ma le faamalamalamaina ua sao le Maota. Ua momoli atu lou matupalapala, o le mea lea, sa fia oo foi i ai se faamatalaga a le Nofoa e momoli atu le faamalo i lou tiute fai, mai lava i le 2016 seia oo mai 2021 lenei. Ae manumanu foi, leaga o upu a le atunuu, e avata le tuaoi e fesiliai le lauta, ae lauamatootoo le tofa ma le faautautaga tau falaula. E faaeteete foi la, o lea ua saunoa le Taitai o le Maota e faamanino tulaga uma, malo le fautua, malo galue, amuia lea itumalo, amuia. Ioe ta te fia maua le tamaoiga o le Atua lena ua avatu ia te oe. E ese le, e i ai foi la e taimi e momoli mai ai

le feau, e pei lava o upu o le Afioga Paia a le Atua. O si tali filemu lava ma le momoliga o le feau, e liulialo ai le tofa ma le faautaga a le Malo.

Ua talia lau fautuaga, o le a le aso? A lea ua e faafofoga mai, ua matua manino uma mea uma. Ua talia talosaga. O le faailoga lena o lau tautua toto, tautua matavela, alofa i le atunuu, alofa i le itumalo aemaise le mamalu o le Palemene lenei. Ia agalelei le Atua, saga faatupu tele le tamaoiga i mafauauga. E masani lava ona ou talanoa i lau Afioga, o, very constructive comments, e te le tae otaota, ui o lea e pei o le a tau selu atu i lau Afioga. A o le agaga o le Nofoa, o le faamalo tapena, aua o toe lauga nei o lenei Paeaiga, tatala uma taofi ia.

Se i tulai mai, ou te vaai atu o lena e te toe fia tulai mai.

Afioga Faaulusau Rosa Duffy Stowers: Faafetai i lau Afioga i le Fofoga Fetalai, e i ai le faifeau a le matou ekalesia i le matou Matagaluega. A faapea nei e sau ni saunoaga faapena, pau lava le tala a le faifeau e fai keep it going.... Lau Afioga i le Fofoga Fetalai, faafetai tele lava mo le saunoaga matagofie, faafetai foi faaeaea, faafetai foi i lau Afioga i le Palemia mo le toe fofolaina mai o ni manatu sa faapena ona tuuina atu. Ae tasi lava si vaega lena e le i oo i ai le Palemai. Ae ou te talitonu ai ona o lea sa saunoa i ai le Afioga i le sui Palemia, i le aso ananafi ona o lea sa e toesea, i le vaega lea o le talosaga ma se tuualalo i tina ma tamaitai. Ma lou faaloalo faafetai.

SUI FOFOGA FETALAI: Ou te fautuaina le sui usufono, ne i mea ane foi ua toe vaemania lau lauga ua aulelei mea uma e pei o oe. E le i tofia se tatou Sui Palemia, ae ave sao pea i le Minisita o Tina ma Tamaitai ne i toe tulai mai foi se isi ma faasoesa ai i le Nofoa, ae saunoa.

Se i toe tulai mai le Taitai o le Malo.

Susuga Hon Tuilaepa Auelua Fatialofa Luepsoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ua ese le faiga lea ua alu ai le Kapeneta i le taimi lenei, sa ou faalauina foi. E tofi lava faasolosolo le auvaa, a ou leai loa, e le mafai lava ona le tofia le Sui Palemia. Afai loa ou te le o faaleoina, o lona uiga e Sui Palemia uma lava le vaega lea. Lau Afioga i le Fofoga Fetalai, e faapena le faiga lea e alu ai nei.

SUI FOFOGA FETALAI: O lea la ua manino, ua manino lelei lava. Ua maea le saunoaga a le sui usufono.

Afioga Faaulusau Rosa Duffy Stowers: Faafetai i lau Afioga.

SUI FOFOGA FETALAI: E toe momoli atu le faamalo ma le faafetai, malo tapena, tapena lelei mo le Nofoaiga fou.

O le avanoa lenei mo se isi foi sui usufono e fia saunoa, a o faafogafoga mai lona itumalo. O toe lauga nei, e matau atu o lea ua tulai mai le Tuiatua Faanofonofu Aleipata Itupa i Lalo. Lau Afioga Tafua, saunoa ia.

Afioga TAFUA MALUELUE TAFUA (Aleipata Itupa i Lalo): Se maumau pe a na mafai ona ou faapipiina ni apaau, ua faapipii ni ou apaau papae e te lele atu ai i luga i le manaia o lau Fofoga Fetalai. Malo i lau Afioga, faafetai lava.

Lau Afioga i le Palemia ma le Kapeneta, faapea foi le mamalu o lenei Itu, le paia o Ofisa Sili o Pulega o Matagaluega, le Ofisa o le Fono, ua tatou feiloai fiafia i lenei taeao fou. Ailoga o le a, o le taeao o le faafetai ma le viiviiga i le Atua, ua tele atinae lelei ua uma ona faatino i lenei 5 tausaga i le tatou Nofoaiga. E le manatu foi e tele se lauga na o le faafetai lava ona ou nofo lea i lalo. Ae ua ou vaai atu i lenei taeao, manaia tele le lauga a le sui usufono lea ua maea atu nei, ona ua nofo ma faaviivii le Taitaifono. E faafetai atu foi i lau Susuga Faaulusau, malo lava. A o ou i ai pea i le tatou Komiti, e momoli atu foi le agaga faafetai i le Komiti lea o Atinae Tetele a le Malo. Se i fai sina upu puupuu e faigata le faafofogaaga a Samoa, aemaise o le afaigaluega a le Atua o lo o tapuai mai.

I lenei taeao fou, faafetai i le alofa o le Atua, ua maua le laolao ua tatou feiloai ai ma fai se tatou upu, ma viivii ai pea Lona suafa paia. E le o ni tapalega ua gagase ua mafua ai ona vailuulu le aso ua ula ma le taeao ua maua. A ua mafua ona suatia vanilau ma elia le tafau o le olotele, ona o mamalu se i tau faapale ma paia se i tinousi. O lele ua aliitia fanua ua nofoia auoloolo, ua atoa nei lanu o le nuanua, ua sua fetuitui le tai ua atoa foi lio o le masina i mamalu ia ua sasao nei. O le a ou le aapa la i le matila ma le ofeloa, aua o lele ua itea ua oloa le vao, ua tau lupe o seuga, e pei o le upu i Atua, ia Ulumu ma Lefaoseu. Ou te le tataina foi le liu, e na ona ou tu lilia faalaa tu vanu, e pei o le tala i Aana ia Lemalu ma Le Mamea ma lo la fale na toese.

Ou te tulai ai ma le agaga faaaloalo ma le migao e tata ai, aua o oe Samoa o le ia e lililo, e te talatofi, ae talatau Toga. Ae tau ia ina ou faailo lupe o le taeao, aua sa tatou vao eseese a o lenei ua tatou fuifui faatasi. E momoe ma manu e le fati, ae sau mala e atiae. O upu lava ia, tatou te faalogo pea i ai, a o lenei itula, o lea ua ou manatu ai, o lea e i ai le ao pouliuli i le Palemene, e molimoli atu ai alofaaga ma faamaisega i le faletua o Vaafusuaga aemaise le aiga ma le itumalo. Tau ia ina ia alofagia e le Atua ia maua se nofoaga mau i le lagi. I lea lava nota, e ui ina ua maea le aso, o ananafi ea po o talaatu ananafi, e molimoli atu foi faamaisega i le Afioga ia Lealailepule e tusa ai ma le toesea o le tina, ia agalelei le Atua, maua le faamafanafanaga i lau Afioga aemaise aiga na lua.

E faapena foi ma si ou aiga, Mulipola o fea foi le mea e i ai taua? O Apolima-uta i le Susuga ia Siliyai, o se tasi o tina o lou aiga, ma e palota

foi ia te au. O lea ua solitulafono, ae leai la se mea o i ai, o lea ua maliu le olomatua.

O lea ua tatou feiloai e ui lava i faanoanoaga, a o lea ua tatou feiloai fiafia i Tiafau nei i pue o manu ae le o tua o manu. Ou te le tatalaina foi le fue lavelave o ou sa Samoa ma faiga, aua ou te talitonu o paia lava ma mamalu o le atunuu ua aitele i vailiili ti, a uma ona faaae ma faaae i luma o fale, e outou tuua ma ni o matou matua lea, ona ou faapea lea, tulou, tulou ia le paia ma le mamalu.

Lau Afioga i le Fofoga Fetalai, ia ou te toe faatalofa atu i lau Afioga, e momoli atu foi faamanuiaga i le toeaina matua. E ui lava ina le o i i, ae talofa e i si toeaina ua ou maua le tala i lauga ma saunoaga foi ma fetalaiga, o le toe tausaga lenei o le a le toe tulai mai le Toeaina. O lea e ui ina le o i i le Afioga ia Toleafoa, ae molimoli atu ai alofaaga po, e le gata i lea, ma faamanuiaga o le a malolo manumalo. E le gata foi i lea o le Afioga ia Faasoo, le Afioga ia Aeau, o se tasi o Tama matua o le Maota, le Afioga i si Toeaina o lea e faalagi o le Sui Palemia ia Leao Tuitama, faapea foi ma Mulipola, pe i ai ma se isi o pau ia te au. Ia, o faamanuiaga na, o outou mama na. Afai o pau se isi, ia faamagalo mai, ae ia manuia lava lo outou litaea. A o e faafofoga mai Toleafoa, talofa e, maumau lena atamai o le a e alu ma oe. Ia o le a matou tui le mulipapaga ma tapuaia ou faiva manaia, manuia lau faamalologa. Ia, e faapena foi ma outou uma pei ona ou taua.

Lau Afioga i le Palemia ma le Kapeneta faapea foi Minisita, le Sui Palemia ia Tuitama o la e soisoi mai, ia e Sui Palemia uma lava outou, ae se i ou faalagia oe i lenei aso, na pau lava lenei o le aso e te Sui Palemia ai, a o lea o le a faamaumau i faamaumauga, tulou lau Afioga i le Fofoga Fetalai, se i faamalie ia se i Sui Palemia si ou uso i lenei aso.

Ou te faatulou atu i Lana Afioga Mamalu O Le Ao o le Malo...

SUI FOFOGA FETALAI: Malie le sui usufono mamalu o lo o saunoa se i tulai mai lava le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ia malamalama lelei o lau upu lea sa fai atu, pe a ou le i ai. Ae a ou i ai loa, o lē a e nofo i lou itu taumatau, o lena.

Afioga TAFUA MALUELUE TAFUA: Faafetai i lau Afioga. Faafetai le faaeaea i sia foi Tama matua ua loa lana tautua. O le a ou oo atu e faigata le tatou Malo e 3 o le Fefaatauagai o Malo, Lau Afioga Mamalu O Le Ao o le Malo, lau Afioga Tuiaana Tuimalealiifano Vaaletoa ma lau Masiofo, lau Afioga i le Sui o le Fono a Sui Tofia lau Afioga Le Mamea Ropati faapea foi si ou faletua.

Lau Afioga i le Faamasino Sili ia Siatu Perese faapea foi le Vasega o Faamasinoga, Alii ma Tamaitai Faamasino o le Faamasinoga o Soligatulafono. E le gata i lea, ou te faatalofa atu foi i lau Afioga i le Peresetene lau Afioga Fepuleai Attila Matau ma le faletua, afifio Sui Peresetene ma Faamasino Samoa o le tatou Faamasinoga o Fanua ma Suafa, ma le Ofisa Sili o Pulega o le Matagaluega aemaise le au Sui Resitala ma le mamalu o le Faamasinoga.

Afio foi lau Afioga i le Fofoga Fetalai ma le mamalu o sui usufono o le Palemene, aemaise le Failautusi o le Fono ma le mamalu o le tatou Pulega. Ou te faatalofa atu foi i Ofisa Sili o Pulega aemaise Pule Sili o Faalapotopotoga Tumaoti o Enterprises a le Malo atoa ai ma le Vaega foi lea Tumaoti o le Private Sector, Faauluuluga, aemaise foi o le mamalu o le atunuu o fai a latou pisinisi.

E le gata i lea, avea lenei avanoa ou te faatalofa aloaia atu ai i afioga i alii ma tamaitai Amepasa ma Sui o Malo Aufaatasi o lo o tatou i ai, ia ma tatou paaga tumau o lo o maua mai ai pea nai tupe e fesoasoani i le tatou paketi. Mai lea foi nota, ou te faafetai tele i atunuu e pei o Ausetalia, Niu Sila, Sapani, Saina, Korea, o le Malo Aufaatasi, faapena foi ma le Malo Aufaatasi lea i polokalame o lo o maua mai ai a tatou fesoasoani, ae le gata i lea o le tatou Budget Support, aua o le tasi lea vaega taua tele, e tatau lava ona ou taua i lau lauga. E momoli atu le agaga faafetai i a tatou paaga o lo o maua mai ai le tupe e fesoasoani e faatino ai a tatou atinae tetele, ae le gata i lea o nai mea laiti foi ia e pei o malae lakapi, o mea o faleaoga. O mea na, e le faagaloina lava nei atunuu i le agalelei mai.

Ae se i fai sina au tala puupuu i le vaega lea, leaga o le mafuaaga tonu e maua mai ai le Budget Support po o tupe nei e aumai i atunuu tetele nei e fesoasoani ia tatou, leaga o lea e ausia e Samoa policies, faiga faavae, o lea e aumai e mulimulitai ai le faaogaina o tupe nei. Afai la e le mulimulitaia e tatou faiga faavae ma e le o usitaia, ia e leai ma se tupe e aumaia.

Ae momoli atu le agaga faafetai i lau Afioga Sili lau Afioga i le Minisita aemaise lau Minisita Lagolago faapea le Ofisa Sili o Pulega o Tupe, Faasisina aemaise lau Matagaluega. Malo faafetai, faafetai mo le faasoasoina o le tupe. E ui lava o le tatou tupe na o le \$40 miliona lea e faaopoopo, ae afai lava e alualuai faapea, ailoga e toe faia se tatou Tala Faaopoopo o le Tupe. O le uiga o lau tala o le faamai, aua afai ae maua nisi o tatou, o lau lava prediction po o lau au lava hypothesize ina o le mea e ono tupu mai, afai ae lavea tatou i le faamai, e mautinoa lava e fai le tatou Tala o le Tupe i se isi vaitaimi e le o toe mamao atu i luma atu po o le isi 2 i le 3 masina, ia po o le masina fou foi. O lona uiga, e toe talanoa foi le Tala Faaopoopo o le Tupe, toe siisii le tatou tupe e fesoasoani i le tatou faamai pe afai ae maua se isi. Ae faafetai i le Atua ua manuia Samoa. Ou te le iloa po o le a le mea lea tatou te vevesi ai, a, tulou lava, i le eseese o Pati ma le eseese o finagalo o le atunuu. A o le mea moni lava ia, afai o faafofoga mai

nai aiga, o uso ma tuafafine i fafo, aemaise o tatou aiga ma le tele o tagata Samoa o lo o i fafo, faamolemole, e leai ma se mea o tupu ia Samoa, leai ma se mea. Ou te ofo pe afai tou te alalaga ma fai mai o lea e pologa Samoa, tou te alalaga ma fai mai o lea e fia taumamafa le atunuu? E leai ma se mea faapena o tupu. O au ia i tua e pula le fai, faapea le tetele o talo la e i ai, tulou lava, fua le toganiu. O tua a leai se meaai, ai le luau ulo, tulou, ioe, e tua lava i lima. O le mea lea ou te faafetai ai i si au uo o Lopao, e le tau assess ina le manuia o lau Afioga, e le tau fuafuaina tala a le atunuu i lau Afioga, e tasi lava le alu atu i le maketi, ua tai \$10 i le tautalo. Talofa e i le oi o si ou nuu e fai maumaga ma le matou itumalo, e omai ma tagatalo pe 3, ae iu atu ia au, “Tafua aumai se mea se i fai ai se matou pasese e le o taulia talo, ua tele tele le mea i le maketi.” O fua vaaia ia lau Afioga i le Minisita, e momoli atu ai le agaga faafetai. Faafetai i le Matagaluega, faafetai ia Tilafono aemaise le Pulega o Faatoaga, se o fua vaaia ia, o faailoga vaaia foi ia. Pau lava le mea ou te tuualalo atu ai, e le o lava le tatou tipolo foi lele o le Tahitian lime, ia ma le isi vaega lena o mea o laau foi nei e le maua i inei. Na saunoa le Palemia o mea na e te alu lava oe e faamili au mea, e sao. Na ou tago atu nei i lau taga i le taeao, ou faapea, po o le a lenei mea mafanafana lapoa e i ai, ae ua ou te i i le talatala atu ae tilotilo mai Gatoloai ma Lauofo, o mea o fatu meleni. Ioe. Na ou ai lava i le faleaiga, tulou, i le isi aso, o meleni mai Toga, ona ou tago lava lea aumai. Vaai i lea, silasila mai a outou Afioga, ia aua foi o nai mea ia e iniini mai ona ou alu lea ave e toto i lau faatoaga.

O le mea la lena, a o lea ua ou manatua ai le isi mea lau Afioga i le Taitai o le atunuu ma le mamalu o le Kapeneta, se ai lava se manaia ae faapea, e malaga a CEO ma ACEO i a latou taavale i luga o le auala, aua o lau pese tele lava lea e fai pe a o atu le Matagaluega o Galuega, Matagaluega a le LTA, Matagaluega foi ia e toatele lava lea e i lalo o le matou Komiti, ia, o matou faamaumauga, toetiiti lava 20 mea o ogauala i totonu o le taulaga ma le alu i tua ma le alu agai le malae vaalele, e timu loa lava sua loa le fasimea lena. Faafetai tele lava Galumalemana, faafetai foi i le Ofisa o Galuega ma lau Afioga Papalii, ua talia lava talosaga. Atonu e faasoesa ma faatiga taliga i a outou Afioga, ae faafetai, ua talia lelei.

Ua ou alu atu i ina i Vaipuna i le magafa foi lea e i i i talaane o le fale o Michelle Meredith i ina faafesagai ma Lauofo, ua fai mea e toa ai le vai i ina, faafetai lava ua talia ma le fiafia matou tuualalo. E oo i le auala lea e i Vaivase sa ou lauga ai foi i le isi taimi, ua ou alu atu Galumalemana ua fai, ua maualuga le mea, ua fai le mea e alu ai le alavai. Oka se manaia. Faafetai. E to lou pulou i a outou Afioga. E sao lelei lava le saunoaga a Faaulusau ananafi, aua o le tagata lea o Faaulusau o le Auditor o le matou Komiti. Faafetai foi i le Afioga ia Olo, le Afioga ia Faumuina, le Afioga ia Laauli, le Afioga ia Faaulusau ia ma Tapulesatele o le matou Komiti lea. E ui lava la ina ua le toe i ai Laauli faapena ma... mulimuli ane ua te i lava ua matou le feiloai ma Olo ma Faumuina, ia fai mai ua tutuli e le Fofoga Fetalai. E le i

tutulia, ai lava ua o laua, ae ui i lea, e leai, e sao nai uso, ai na ave i ai se tusi a le Fofoga Fetalai e aua le toe omai. A o le mea sili, ua ou fiafia ua ou toe vaai atu alii ua lua toe malaga mai. Ae faaumiumi sau tala, o le manaia o lenei Komiti, a. Aua foi o le manaia e tiga... a faapea o le talanoaga o le faataitaiga, o le Ofisa o Vaai, ae masalo e oo i vaa i fafo, e oo i mea uma o le lalolagi ua fesili i ai le matou Komiti. E le relevant, ae ou te tuua lava e tuufau lava le Komiti ia e alu lava. A omai foi le Ofisa o le Vai, ia masalo e oo lava... toetoe o le vai foi lele o le Mediterrean Sea e le i talanoaina, ae o i ai. Oi, ua galo ia te au le Afioga ia Lopao. O le tagata lea o Lopao lau Afioga i le Taitai ma le mamalu o le Palemene faapea le faafofogaaga a Samoa, na alu matou asiasiga i le uafu foi lea mo poloka tetele lava faapea le tetele la e feseetai i lalo, pei o lagolago ia o le uafu ae le i faia le fola. Ma te o atu la, masalo pe faapea le va o le mea pe 3 inisi le va o le mea o la e le o lelei le faataatiaga o le poloka sima foi lea i lalo. Ia sau loa le matou inisinia faapitoa lea o Lopao fai i ai... na fai le matou tusi e ave i le Sapani Konesale na omai mai fafo e fai le auala, e le o sao le faapipiiga o le tatou poloka lea, e le mau, e i ai le taimi e oso le mafuie palasi i lalo le uafu. Na maua ai lava le tali. Na maua mai le tali i le inisinia faapitoa, Structural Engineer. O lea e molimau Olo ma le Afioga ia Faumuina faapena foi ma Faaulusau ma Tapulesatele, o le manaia lea o le Komiti.

SUI FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, se i malolo le sui usufono o lo o saunoa nei. Ina ia silafia, o mea ia e seasea iloa. O le Afioga ia Lopao, o le inisinia faamauina mai o i Niu Sila, a o le isi la inisinia faamauina e seasea iloa e nisi, o Peseta. O Peseta la, sa na ueloina mea o le loketi foi lele o Apolo. E tau le iloa e tatou tagata le maoae o inisinia ia e i totonu o le tatou Malo, totonu o le tatou Palemene. Ne i te i ua i ai se mea e pei o se loketi e moomia e le sui usufono mo le itumalo, o lea e i ai le Minisita Lagolago po o le Palemia Lagolago, o Peseta. E le o se mea foi lele e tauiso lea mea, leaga o lea e i ai i le faamaumauga, o lona ata na pue i luga o le loketi lea o le a fana, a o lea na toe alu atu lava le toeaina e alu atu e siaki po o sao, taimi ia sa fealualuai ai i le lalolagi ae faaiifo i Amerika.

SUI FOFOGA FETALAI: Se i malie lava le sui usufono o lo o tulai mai se i ave muamua lava le avanoa ia Peseta leaga o lea sa taua lona suafa.

Afioga Peseta Vaifou Tevagaena (Faasaleleaga Nu.4): Faafetai i lau Afioga i le Fofoga Fetalai, atonu foi o se avanoa lelei lea i le faafogafoga mai a le atunuu ma... aemaise foi si ou itumalo, ona o lea ua saunoa le Taitai

o le Malo i le tulaga lea, e le o se faamatalaga e faamitamita ai lou nei foi tagata. A o se tulaga ou te faafetai ai i le Atua ona ua ae le tofa i le Palemia i le tulaga lea ona o le taimi lea e saunoa i ai le Palemia, masalo o le taimi tonu lea i le 1980, e felatai lava ma faleaoga i Amerika ma le Afioga ia Fonotoe. E aoga le Afioga ia Lauofo i le Iunivesite i Long Beach, ae ou aoga i i i San Beda, e tuaoi nuu ia i le faa-matata eseese, ona iu ai lea o le aoga mai le 1979, 1980, 1981, ona tofia ai lea o au e le Iuni lea ua maua lou avanoa i le Iuni tele lea a le Malo o Amerika, o lea e taua nei o le International Iron Weapon Union. O le Iuni lea, o lo o latou faataatiaina ma fausiaina pipeline i totonu o Iraq, Iran ma... lea e ala ai ona umia e Amerika le fefaatauaiga o le suauu. Aua foi pei lava o le tele o le pipeline lea e i totonu o Malo tetele ia. O i e avatu ai tagata e ueloina ituaiga paipa tetele faapenei ma uamea tetele.

I le 1981, na filifilia ai lea o au e le iuni tele lenei, lea e tau o le International Iron Weapon Union Structural local forthwith thread i totonu o Kalefonia. Masalo a outou silasila i luga o faamaumauga i luga o le facebook ma totonu o LA, lea o lo o i ai le igoa o le itumalo lenei, Peseta Vaifou Tevagaena, na filifilia ai lou tagata, ae na o au lava o le sui o le Pasefika e auina atu i le fausiaina o le longsmart. O le longsmart, o le vaega lea e faapipiina ai loketi ia e faafelele i le masina.

Afioga Hon Loau Sola Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, pe maua se avanoa o se mea e fia faamalamalama. O le a alu le tatou taeao i le tatou faalogologo i tala pepelo a Peseta, a o lea e fia faagasolo le tatou Fonotaga lau Afioga i le Fofoga Fetalai. Ae a pe a ae ia i fanua lona sa se i i ai se taimi ona tatou faalogologo lea i tua, leaga o lea e faagasolo le tatou Fono lau Afioga.

SUI FOFOGA FETALAI: Malie lau Afioga i le Minisita, o lea ua ou tuua i ai le avanoa, e i ai ona taua aua le faafofoga mai a le itumalo. Saunoa le sui usufono.

Afioga Peseta Vaifou Tevagaena: Lau Afioga i le Fofoga Fetalai, ou te tau le fia tali i le Minisita, aua e gata lava i Faleula i le faleaoga i Faleula. Ioe. Ona alu atu ai lava lea lakapi, lakapi, ia lea ua nofo i i. A o le itumalo o Faasaleleaga Nu.4 o la e faalogologo mai lou nuu, I'm everywhere, everywhere, international, international. Not only local but international. Ia e pei o le tulaga lena. O lea la ou te faafetai ai i le Afioga i le Taitai o le Malo, o la e ia te ia faamaumauga, ia te ia ata, ioe, e tau atu ai ou te le soona sau i le Maota lenei. O le isi foi Paeaiga lea e sau, I'm ready anytime, anywhere, I'm ready. Lau Afioga i le Fofoga Fetalai, faafetai.

SUI FOFOGA FETALAI: Ia, ua maea le avanoa o le sui usufono.

Tofa Hon Lauofo Fonotoe Nuafesili Pierre Lauofo (Anoamaa Sisifo):
Lau Afioga i le Fofoga Fetalai...

SUI FOFOGA FETALAI: E faatalasua lava e i ai ona taua, aua o lea ua saunoa le Taitai o le Maota, ua faailoa foi lau taleni mai le Atua, o mea e le tatau ona natia, e pei o le ala lea o le tuu atu pea o le avanoa, ae pei o le a mamao tele lau alu.

Se i tuu atu le avanoa i le Afioga ia Fonotoe.

Tofa Hon Lauofo Fonotoe Nuafesili Pierre Lauofo: Faafetai. Faafetai i lau Afioga i le Fofoga Fetalai i lenei foi taeao fou i le toe faaauauina o le tatou Fonotaga. Ia ona o lea sa saunoa lou uso a sui usufono le Tofa i le Matua ia Tafua e faapea i ana fatu ia sa... e sao, na faaali mai ia maua ma le Afioga ia Gatoloai. O la e la ou te fai lava i ai ona o au sa fai lau toga meleni i aso ia, o lea ou te fai i ai, e le o ni fatu meleni au fatu na, ioe. Ne i toto, toto au fatu ae loka ai oe i se taimi, ioe. O lea la ou te fautua lava i ai i lou uso a sui usufono.

Ae sao le Afioga a Peseta, ou te molimau atu, Pese, ia o lena foi vaitaimi o matou taamimilo solo e tausaili se lumanai i o i na atunuu. E masani la ona ma i uta i ina i le Mohabbit Desi, o i ina la lea sa fau ai le loketi lea e taua e lou uso. O le tele ia o le galuega. E sao Pese, o le loketi lea na fana, lea na sau i le TV lea na maimoa ai le lalolagi, e le i tea ao ae pa, pa lava salalau ae pe toa-valu ea tagata sa maliliu ai. A o le mea taua, o le uelo ae le o le pa.

SUI FOFOGA FETALAI: Faafetai. Ma e lelei foi le tulai mai a le sui usufono ma lana faauilavea, ua iloa atu ai, faamolemole le Minisita o le Ofisa o Faatoaga se i siaki fatu ia po o ni fatu sao o meleni mai Toga. Ae tuu atu le avanoa ia Olo leaga o lea e... Faafetai.

Ia se i tulai mai le sui usufono mo le Alataua Sisifo.

Afioga Aliimalemanu Alofa Tuuau (Alataua Sisifo): Faafetai mo le avanoa. Lau Afioga i le Fofoga Fetalai, o le mea ou te fia malamalama ai, o le a le fesootaiga o saunoaga a Peseta ma le saunoaga a Fonotoe i le lauga lea na fai nei? Faafetai.

SUI FOFOGA FETALAI: Ia, o le tele ia o ona fesootaiga masalo e le o silafia e le Taitaifono o le Komiti o Tupe. O le tele ia o lea e iloa e le Nofoa. O le mea la lea, ou te manatu, o le ala foi lea o le faatagaina ina ia saunoa e i ai ona sootaga i tomai eseese, ioe. O lea la e saunoa i ai le sui usufono mo Aleipata Itupa i Lalo, o le taumafai e ave avanoa.

Ou te faamalulu atu i le sui usufono mo Aleipata Itupa i Lalo o lo o saunoa, talu ai ona o lea ua tatou taunuu i le tatou malologa masani masalo a le Maota

e maua ai foi se faasiliga malosi ma totoa i tua. E i ai le manatu o le a faataatiaese galuega a le Maota mo lana malologa masalo mo le 15 minute.

Na faataatiaese Taulumaga a le Fono Aoaofa Faitulafono mo lana malologa masani i le itula e 10:42 i le taeao ma toe faaauau i le itula e 11:38 i le taeao.

Na toe faaauau felafolafoga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.1) 2020/2021.

SUI FOFOGA FETALAI: Ou te faasilasila atu ua toe amatalia nei Taulumaga o le Fono Aoaofa Faitulafono.

Ou te manatu ua maua foi se faasiliga malosi e le mamalu o le Palemene e pei ona i ai le faiga malologa ua tuanai nei e faaauau ai tatou galuega o lenei aso.

E faataatiaese Taulumaga a le Fono Aoaofa o saunoa le sui usufono mamalu mo Aleipata Itupa i Lalo. Ou te tapa lau Afioga i le sui usufono mamalu le Tuiatua Faanofonofa e te tulai mai e faaauau lau saunoaga.

Afioga TAFUA MALUELUE TAFUA: Faafetai lava i lau Afioga i le Fofoga Fetalai, faafetai foi i lenei itula o le aso ua maua se faasiliga malosi e le mamalu o le Palemene aemaise foi Ofisa Sili o Pulega o Matagaluega ma Faalapotopotoga Tumaoti a le Malo, vae atu le faafofogaaga mai a Samoa. I lenei itula o le tatou Fonotaga lau Afioga, ua aoga foi le malolo ua ou manatua ai e le i faafeiloai atu i le aufaigaluega a le Atua, aemaise le Susuga i le Taitaifono, o lea ua afa le lauga ae faatoa toe manatua. Ae o lenei itula, e momoli atu le agaga fiafia e faafeiloai atu i le aufaigaluega paia a le Atua, aemaise foi le Susuga i le Taitaifono o le Ekalesia Soofaatasi ma le latou laulau a fonofono, ae le gata i lea a o Peresetene po o Taitai po o Taiulu foi o Ekalesia taitasi i Samoa nei, aemaise foi le mamalu o faafeagaiga, e le gata iinei ae faapea foi atunuu mamao. Ou te faatalofa atu i ai.

E faapea foi ona ou faatalofa atu i si ou itumalo, le tapuaiga i le Matua ia Fuataga, aemaise foi le tapuaiga i le afio o Alaalamalae Saumalu ma Laupola faapea Pule na Taitai ma Malaefono ia Tiavea ma Satitoa. Ia, afio mai le Alii o le Itu ia Tauiliili aemaise foi le Tane o le Itu ia Amoa ma le mamalu ia Saleaamua.

Ae mulimuli e le faaitiitia ai o le paia i Aiga ma Tama, o Tama ma Aiga, faapea foi le usoga ia Tumua ma Pule, Ituau ma Alataua, Aiga i le Tai ma le Vaa o Fonoti.

Ia, e le faagaloina foi o tatou uso i Tutuila ma Manua, Amerika Samoa aemaise le faamanuiaga i le Kovana ua foi atu ia Lolo ma si ana faigamalo, ae le gata i lea o le Susuga i le Kovana fou ma lana Lutena Kovana, e faapena foi le Peresetene ma le Senate. E le gata i lea e faapea foi le Fofoga Fetalai ma le paia o le Maota, ae le galo ai foi le Afioga i le Faamasino Sili ma le Matagaluega o Faamasinoga. Ia, atonu o paia lava ia i le afifio o Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, ae faapea foi le Tootoo o le Faleula, Tama a le Manuatele ma upu i le Faleagafulu. Ia, o paia na i lou talitonuga, o paia lava o Samoa mai le vavau e oo i le faavavau e leai se iota e faaopopo. E fai mai foi nisi o failauga, o paia mai le taisamasama o le Tuimanua seia paia le taiulaula o Nafanua na to ai Malo. Ae i lou talitonuga, o na paia, o paia lava e tumau, ae o le tatou va lelei ma le tatou feiloaiga i leni taeao, ia o lo o agalelei mai le Atua.

Ae ou te faatalofa atu i le paia ma le mamalu o Samoa o lo o faafofoga mai aemaise si ou itumalo. Ae faafetaia le Atua ona o lea na oo lau lauga i le taimi foi lea o faalavelave mai nisi foi sa... faafetai mo faauilavea, ae moni lava a au. Na pau lava le mea la ua ou mautinoa i le faauilavea lea na uma nei, o le Afioga ia Peseta ma le Afioga ia Lauofo, o tagata ua leva ona soifua, e le gata i Samoa nei a o nisi itu tetele o le lalolagi na taua mai mea sa oulua alaala ai, o i ina i le mea foi lea o le Mohabbat Desert. Ia mo le silafia e le faafofogaaga a nisi e le i oo i Amerika, o le Mohabbat Desert e alu atu lava le auala lea i le coast road i Kalefonia, alu agai i luga i Las Vegas i le mea o lo o i ai le falemataaga foi lea fai mai nisi o le lagi lona 2 lea, ia po o le lagi faa-lalo nei. O lea la ou te mautinoa lau Afioga i le Fofoga Fetalai, na ala ona mu le loketi lea ona o Lauofo ma Peseta i le le lelei ona ueloina o uamea o le...

SUI FOFOGA FETALAI: Malie le sui usufono o lo o saunua, se i tulai mai le faauilavea. Leaga o lea foi sa taua lona suafa. Ia o le a tuu atu le avanoa e te saunua ai, aua foi ne i umi.

Afioga Peseta Vaifou Tevagaena: Lau Afioga i le Fofoga Fetalai, ua fofoga lava e fia faalogo i le matagofie o le sausau a le Tuiatua Faanofonofo. Ae i lau matau lava mai le amataga o le lauga a le Tuiatua, sa ou matauina lava ma le totoa fatu meleni. O lou lava manatu o ni fatu fou, ae o lea ua ou te i i le faaali mai ia te au i fafo lau Afioga, ua ola meleni. Ia tasi lea vaega lau Afioga, ae semeamanu lava ua maua si ou avanoa, se i ou tali atu lava i le mea lea na aumai e le finagalo o si ou uso ia Lauofo, leai, leaga o lea e faalogologo le atunuu. O le vaa lea sa ou i ai i le Florida, na fau i le aai o le Airforce lea e tau o Venabur Airforce i totonu o LA, le vaa la lea na fana e le i pa. O le vaa lea na pa, o le vaa lea na fana i se vaimea o TATTIS lata i ina i Miami. Ae na ala ona pa, o le faavalevavea o le pailate, e vaai atu lava ua oo i le ao ae alu lava.

Ia o le mafuaaga lena lau Afioga e fia faasao atu ai i si ou uso ia Lauofo, leai e le o le vaa lea na ou i ai. Ia, pei o se faasoga lea o le mea lea lau Afioga ae faafetai i si ou uso ia Tafua, faamalo faafetai. Leaga o la e faafogafoga mai si ou itumalo. Ia ma lou faaaloalo lava lau Afioga i le Fofoga Fetalai.

SUI FOFOGA FETALAI: Faafetai. Ia o lea la ua manino, e ese lava le vaa lea sa galue ai Peseta, ese foi le vaa lea na pa.

O le mea la lea, ia tulai mai lau Afioga i le Tuiatua Faanofonofu e faaauau le saunoaga.

Afioga TAFUA MALUELUE TAFUA: Faafetai. Lau Afioga i le Fofoga Fetalai, masalo e pei ona ou uluai talanoa atu, o le taeao leni o le taeao o le faafetai, o le taeao o le viiga ma le faamalo. E le gata i le Kapeneta ma le Taitai o le Malo, ae faapea foi ma Ofisa Sili o Pulega o Matagaluega eseese.

Ia, o le a ou oto maia le vaega lea o faamanuiaga foi ia a le au penisiona. Aua mo le silafia o au foi le isi penisione lea e i ai. Sa i le 2018 sa \$135, 2019 ua sii le \$10 lea ua \$145, ia lea ua tatou oo mai i le 2021, o lea ua \$160. Ae na o se tuualalo i lau Afioga Sili pe le maua sina faaopoopo e fesoasoani ia Toleafoa, ma si toeaina o Tuitama aemaise foi o Faasoo ma le vaega lea ua litaea, ma i matou uma lava. Pe toe tuu i ai se mea, po o lava se tupe o lau paketi. Ma le isi mea e faaopoopo atu ai, e matua lagolagoina malosi lava e lou sui usufono le tatou Tala Faaopoopo o Tupe, aua a sii, a fai sina siitaga, atonu lava e le o talafeagai mo le taimi leni o le faamai, ae mo se isi taimi oi luma. O le isi mea e faafetai ai i le Malo, faafetai mo nai faamanuiaga mo lou itumalo, o la ua sua le vai, o la e le i ola le malaevaalele a o la ua uma le malaevaalele. E faafetai foi ia Peseta mo le konekarate, e toe lava o le faata. O le ma talanoaga ma le pule o le malaevaalele, o se taimi o Fepuari o le masina nei, e faatino ai le faamoemoe e umusa ai le malaevaalele. Ae talu ai ona o le faamai ma nisi tulaga le maalofia, atonu o le ala lea ua toe tolopo ai mo se isi taimi o i luma. Ae faafetai mo leni atinae tele, atinae lelei faafetai foi mo le silasila mamao. Faafetai foi i lau Afioga i le Minisita o Turisi, ua maea nai fale ele taua, o le matua manaia lava, ma o la e aumai le tausiga e le Ofisa o Turisi. Ae se i faasolo atu i le itu lea, ne i te i ua misi le Minsita o Fesootaiga, lau Afioga Afamasaga, o le tulaga sa ou pese lava i lea 4, 5 tausaga i le matou TV e le ola. E le gata i lena a o le leitio, e fai lava ma gogolo, le isi vaega o Lemafa e te i lava ua oo atu i ai ae motu lau talanoa. Ae faafetai tele lava ua manino ua manaia ua lelei, ua leai se mea o faaletonu, TV ma le leitio. Ae sole o le taugata ia o le mobile lea e i ai nei, ou te le iloa i le regulator po o faafogafoga mai, ou te le iloa foi po o ai e fuafuaina le totogi o le tatou mobile. O le matua taugata i le taimi nei. Na totogi lau \$20 i le vaiaso na tea nei, pe 2 ea aso, ua toe \$4 la e i ai. Ou te le malamalama la pe faafelea ona aveese na mea, po o le a le ituaiga mea, ua ou le malamalama.

Ae fai mai faaaliga foi ia, ma le isi lena mea, se i tau faaitiitia na mea o faasalalauga. Ua mumu solo le mea, o Samoa e tau o le clean green image. A o le mea lea ua i ai tatou, ua red red image le mea lea ua i ai. Ua mumu faasoloatoa, e tatau foi ona tau faaitiitia mo faasalalauga, e moni lava o la e maua ai a latou tupe, ae tatau ona silasila i ai lau Afioga mo vaega ia ma le faaaloalo. Na o se tuualalo, ou te le aiaina lava le manaia o tatou telefoni ma mea uma, ae manaia foi ma le tau ia.

Ona ou oo mai lea i le vaega lea o le siisiiga lava ma le faafetai i le Malo. E lagona lava lou agaga faafetai ma le faamalo. E muamua, po o ai na faia le aikia lea o moli o le Kirisimasi. E manatua foi tatou, o na e oi le lalolagi i lenei taimi, ae maeu le soifua o Samoa e leai se faamai. E oi i le Koviti-19, ae a tatou? E pei o lau uluai tala, manuia e fiafia tagata uma, e i ai foi le au faanoanoa, e i ai foi le au tetee, o uiga ia o le soifuaga. Aua o le natura faale-tagata e i ai le tetee, e i iai le ioe, e i ai le faaogatonu foi lele, e tu faavaialua, e i ai lava ma le isi tagata e alu atu i o sau i i, i o i i, i i i o, o le soifuaga lena o tatou. Po o le a le.... a potopoto tagata e toa-lima, e guarantee ai le tagata e toatasi e break away. O le isi tagata e play up lava ia i taimi uma, e faapena le natura o le tagata. Ae o le taimi o le faanoanoa, o lea tatou te i ai mo le lalolagi i le faamai. Ae maeu le faafiafia loto o tatou moli, ave i fafo le tala, vili mai tagata, email mai tagata, faafetai mai e ese le manaia. Aemaise le loneliness i totonu o potu na o latou, o tagata o lea e quarantine i mea faapena i isi atunuu. O le agaga o le faafetai ma le faamalo amuia outou i Samoa e mafanafana lelei le tau, toe manaia moli o laau Kirisimasi.

I lea lava nota, sa ou manatua ai foi, se tasi o alo o le atunuu, ou te le manatua le igoa o si tama. Ae na nofo ma faamaopopo mea o aufaipese, o tagata pepese mai Alaska o Niu Sila, o Ausetalia, o atunuu uma lava o le lalolagi. Ona tuufaatasi lea o aufaipese ae usu nai pese manaia, its very soothing mo le faalogologo. E manaia pe a e nofonono na o oe i le potu, ua 3 vaiaso o la e loka ai oe i le potu. O le agaga lena, e momoli atu ai le agaga faafetai i nei manatu lelei. E le gata i manatu na faatu mai e le Malo, ae faapena foi ma tagata taitoatasi. Ua ou lagona ai lava le ootia foi o le agaga, faafetai ma le faamalo, i le mafanafana na aumai e pese nei, i nai tagata e nonofo toatasi, mo nai tagata matutua, mo nai aiga ua atoa le vaiaso, 2, 3 masina o i totonu o le fale e le feoi, aua sa faasa e Malo i fafo. Ae maeu le faalogologo mai, ae se e tatagi manaia atu pese a tagata Samoa.

Ona ou oo mai lea i le vaega lea e tatau ona faaaoga tatau le avanoa. E faatoa ou faalogo nei lava i le upu lenei i le morning tea. Na musumusu mai le isi sui usufono, e manaia le mea lena e te lauga ai, faaaoga tatau le avanoa. O le a le uiga o lea tala? E faafetai Lautafi, manaia lau polokalame, ua uma ona faamuamua mai, ae o lea o le a ou toe momoli atu le agaga faafetai ma le faamalo o lenei itumalo. E mo le silafia Samoa, a e alu atu i inei i tua, e oso i le auala lea i Tiavea o le Richardson Track, e toetiiti lava maua le 10+ ia fale o la e fai i le taimi nei, currently building. O fale sima, fale piliki fale

laupapa, e mai fea nei tupe? E mai le RSE Scheme, o le tele lava lena. E manatua o la e fai le faamai, o la e galulue alo ma fanau i fafo, ae lafo mai le sau o le tupe ia. E masalo ai e pau lea o le atunuu, e ofo ai economist foi ia, i le fai o le faamai, ae o la lava e olaola lelei tatou tagata. O le agalelei o le alofa, e faavae i le alofa. Ona ou manatua ai lea o le tala a Tofilau lea na fai, talosia ia maua le fasipepa po o fea o taatia ai. Sa fai i le atunuu i lana faamavaega, e pei lava e faapea upu a le toeaina. E afifi mea uma i le filemu, e maua ai le filemu o Samoa, a o na mea uma e tau i luga o le alofa ma le faaaloalo. E pei lava o la e faataua e le toeaina i lana saunoaga lea mulimuli i le aso 23 Novema 1998, e faataua o tu ma aganuu a Samoa e faavae i le alofa ma le faaaloalo, e maua ai le filemu o Samoa. O le matua talafeagai o lena upu mo lenei taimi. E tau luga lalo si o tatou Malo, ae faafetai i le Taitai, e faafetai foi i Taitai o Itu Agai, po o le a le luga ma lalo o tatou finauga i le Palemene, e toamalie lava le tai. E faafetai i lo outou finagalo maualalo, faafetai foi i le amanaia o le atunuu, aemaise le la latou tapuaiga. Aua ne i see tatou i le malu o le tai taeao i le tala o lo o aumai i fafo i tagata o lo o i fafo. Sa ou ola foi au i fafo, e masani lelei i le olaga. E iloa lelei le toatele o tagata, o tagata faigaluega, o tagata e le faigaluega, o le au unemployed ma le au penefiti. Ia o tagata sili na ona ulavavale. A o le mea e sili ai le faanoanoa, o tagata e sili ona oo mai i luma o le tulafono, aua sa ou tausii tulafono mo le 20+ tausaga, o tagata e le lelei le faavae o o latou aiga. E le lolotu, e le tele se tamaoaiga e maua, ae nonofo i fale mautotogi, o tagata sili na ona faaletonu. Ae talosia ua sui i nei taimi, ae taumafai lava ia i ai financial grant po o tupe e foai e le Malo, e tau faapaleni ai le mauoa ma le le mauoa. O uiga la o ia mea o financial grants e avatu e avatu faa-grant foi lele, through mo mea o vouchers pei o Amerika i Tutuila e fai ia food vouchers. A o o la e leai, e fai penefiti e ave i ulugalii e toatele le fanau, e pei foi o Ausetalai. O mea la na o benefits e totogi ai ia nai tamaitai aoga, e faatau ai taumafa a fanau laitii, aemaise a latou aoaoga. O le mea la lea, e faafetai i le Malo, e faafetai i Taitai o le tatou atunuu, e toa malie le tai, e leai se mea e vevesi ai. Ou te faafetai i le tulaga i le tupe e agai mai i le 5 tausaga talu ai. O lau matau, o le \$880+, \$900 miliona, pe sao au pe sese Sili. Ae pei lava bulk figure, lena o le tatou paketi e \$900 miliona, ona fai lea o nai tala o le tupe faaopoopo nai nisi miliona mo atinae e le i faatinoina, pe e le i maea lelei. E le gata i lea a o le isi piliona lea e maua i le private sector, e maua mai ai isi tupe, o le tele lena o le tupe a tatou lea e maua, pe a, a tilotilo i ai. E piliona e fai ai galuega a le Malo, e faatino ai ma tagata faigaluega, a o le isi piliona e taaalo ai le vaega foi lea e fai a latou super maketi ma a latou atinae tetele ma vaega faapena. O lona uiga o lea e solosolo lelei lava le tatou Malo i luga o le Treasury Management Policy, ma faiga faavae uma a lo tatou Malo. O le manuia lena o lea e i ai tatou. O lea foi e fesiligia soo e isi, o le tatou paketi lea e i ai ua matua ova le borrowings ua ova le nonotupe. A o la e manino le faiga faavae o tatou, i le

tulaga o mea tau tupe, e i ai lava le fuainumera e gata ai le mea o le nonogatupe. E aua ne i sili ae, ina ia o gatasi ma affordable, e mafai ona totogi e le Malo a latou aitalafu. O lea foi la ou te faitau atu i le Tala o le Tupe o lenei tausaga ua tuanai, o la e lava le tatou seleni e faaagaga mo le totogiina o aitalafu. O le mea foi lea e ave i ai le faamuamua a le Malo, e momoli atu ai le agaga faafetai, mo le vaega lea.

O le isi vaega, faafetai mo le fuafuaga mamao a le Malo, mo o tatou tagata e iu mai aoga. O lea ou te talanoa atu i le creating employment, suega o avanoa e totogi ai tagata faigaluega. O le faatusa, o lea ua uma ona faafetai ia Lautafi e pei ona, ae faafetai i le Minisita o Aoga, e le o tuu mai i i ia...a o le manaia o lea ua fai le tatou aoga foi lea o Marine Training. E aoga ai seila e o e maua mai ai tupe, e tele foi seleni lea e maua mai. O le saunoaga lea a si tama o lea e pule i le Shipping, o Sooalo ma le vaega. E faafetai lava mo le tautua, faafetai i le auaunaga, e tau foi ma outou le vili mai, vili mai, o mai i le TV ata o le aualii ia. Ae faafetai pe a le o sau se isi ma se siama, e pau lava lena o le popolega. O le tatou Maring Training lea mo isi seila ma kapeteni. E maua mai foi tupe i totonu o le atunuu, tasi lea alagatupe. O lona uiga e iu mai le aoga, o la ua i ai le galuega e alu i ai. E le gata i lea, ua fai le Police Cadet Training, o lea ua agaigai i ai, e maua nai o latou totogi. O le nursing school o le OUM, o le tatou vaega lea e train ai tatou fomai. Na ou faalogo ananafi o lauga se isi i mea ia o... manaia le faamalamalama maiga e le Minisita ma le sui ananafi. Oi leai, o le TV anapo, o le meaalofo lea e aumai i le UN, ave i le MNRE, faasolo mai ai, e aoga ai fanau a le atunuu. Ina ia o mai, maua le tomai faapitoa mo galuega e maua. O le vaega lea, ua leva ona ou finau ai, ia tupu se mea faapea. O lona uiga o le tala, a iu mai le inisia faigaluega o la e i ai le galuega e faigaluega ai. E pei o accountants o loia o faiaoga o saineitisi o mea faapena. O lea lava la ua i ai le fuafuaga mamao a le Malo e momoli atu ai le agaga faafetai. I lau Afioga i le Taitai ma le Kapeneta, aemaise lava le Palemene nei. O le silasila mamao mo le faagasologa o le atunuu. O fea o agai i ai Samoa? E fia selau tagata la e i le NUS, o fea e o ai pe a iu mai aoga? E maua ni galuega? A lea ua ou tau atua le auala lea e faamatala mai i i. E maua avanoa, e le faapea o le a manuia uma, o la foi e tele o tatou laueleele. O le tagata lava ia ua le fiafia i le aoga, la e tele le laueleele ma le mauga e o e eli e toto ai le talo ma le fai. E le faapea e fai atu e tutusa uma tagata, o lou lava lena manatu. Afai e le talafeagai i se finagalo o se isi, ia e faamalulu atu.

Ae o le faafetai lena ua uma ona fai atu Lopaoo, e le tau faailoaina le galuega a lau Afioga, o lea lava e manino i le tau tilotilo i le tele o le talo, tele le fai, o le ufi, o le koko, so o se mea. E oo i lafu moa, faafetai, malo lava faafetai le tautua. Ona ou oo mai lea i le Vaega lea, pulega ia e i lalo o le matou Komiti, e pei ona fai atu, o le LTA, o le malae vaalele, o le Shipping Corporation, ma le Shipping Services Limited. E le gata i lea o le Siosiomaga, o lea ua ou manatua ai sa i ai le Tulafono e tai pe o Tulafono ia

e 3 na uma nei le controversial, e le i controversy tele. O le mea o le faalisiina o fanua, ua ou le manatua le igoa o le Tulafono. E tusa e faalisi le fanua, saina ai le Minisita, ona fai lea o le konekarate. Sa matou i ai ma Manumaleuga, o Tagaloa, o le Ofisa o le Loia sili. E faafetai i lau Afioga Peseta ma nai teine, Teleiai, sa tatou i ai i le faiga o lea tulafono. E atoa lelei le tausaga ma masina o faataavale. E faafetai foi i le Afioga ia Fiamē i lea taimi, o lana Tulafono na aumai e faagaoioi e le Komiti. Na soo Upolu ma Savaii o matou taamilō ai, e i ai foi le au tetee e pei ona ou taua, ae sa manuia lava fuafuaga uma, ona sa faatasi mai le Agaga o le Atua, aemaise o le agaga o le atunuu. Ua manuia mea uma ona ua outou faatasi mai. E leai ma se isi na fesili i le Tulafono lea, o le faa-lisiina o eleele o Samoa. Sa matou i ai ma le Afioga ia Olo ma Faumuina, faapea foi Faaulusau ma Tapulesatele.

E momoli atu ai le agaga faafetai i le matou Komiti, faafetai faatupu manatu, faafetai foi mo fesili tele e aoga aua le lumanai o Samoa. Aua e pei o le mea lava lea sa o matou tulitulia i le polofesa o Tulafono, ma le Loia Sili, le afioga ia Lemalu ea i le taimi lea, po o se mea e manuia ai Samoa po o se mea e oti ai tatou, pe migia atu ai o tatou fanua. A o ou i ai lava i le vaega lea o fanua, faamolemole lava i le Minisita e vaaia o tatou eleele, e tasi lava si au tuualalo lea e avatu i le vaega lea. E faigofie tele ona faatau o tatou fanua, freehold. E manatua foi e na o le 80% foi o ia fanua faa-Samoa ae 20% lea e faasoasoa i le atunuu, mo kuata eka, afa eka ma eka.

O le tuualalo la a le matou Komiti matou te talatalanoa ai pea, e faafaigata le sell ina o tatou fanua tumaoti, faafaigata mo tagata foi ia e sitiseni i le vaiaso na tea nei ae sau faatau le 10 eka pe faatau le afa o Apia. O le mea e le faailoga lanu, ae pei o le faafaigata o le faatusa. A silasila i Rarotoga, o Rarotoga e leai lava ma se fanua e faataua. E lisi uma lava fanua o tagata Rarotoga i tagata faipisinisi i le taulaga. O le mea la lena, pe manaia le fai o se tatou mea foi lele, a o faafofoga mai le Loia Sili, e draft sina mea, ia aua ne i faailoga lanu, a ia faapea si faaupuga foi lele. Pe atoa loa lou 15 tausaga o e totogi lafoga iinei i Samoa ona faatagaina lea, pe 20 foi tausaga, tau faafaigata laititi. Aua o le auala la e fai nei, e nofo loa lava le tagata faatoa sitiseni ananafi ma le teine Samoa po o le tama Samoa, ia o le auala lena, e auala mai ai ona mafai ona faatau le fanua. Ia te au ia, ua faigofie tele, aua e i ai le mea e ono tupu i le ulugalii, o mea lava tatou te le iloa. Ae na ona tuualalo atu ma le faaaloalo lava i lo outou paia ma lo outou mamalu, ia tautuana lea vaega.

Ona ou oo mai lea i le vaega o le Suavai, faafetai Saunoamaalii, faafetai lava mo le talia o a matou fesili pe a outou malaga mai e iloilo. Heseti, ou te vaai atu o e soisoi mai, aua o le isi tagata i le Ofisa o le Vai. E faamalo foi i lou tofiga fou. Ae o le matua faigata lava o lea vaega, o le mea sa matou ilitata tele ai i le vai, o le mea lea o le alu alu lava te i ua le sua. A le o lena e alu alu palapala, a le o lena foi, e tele lava faafitauli. O tagata foi ia e o e aitalafu, fai mai e liki le vai, ae fai mai se e le o liki lava se vai. Ae mo le

silafia, o le oneone e le iloa pe a liki le vai, a o le palapala, e palapala gofie lava, e liki loa le vai maua le tulaga o le vaega lea. E faafetai i le Ofisa o le vai, faafetai mo mea uma. E faafetai foi i le Malo ua sua le matou vai, o le vai la ua i ai nei, ua alu i i Saleaamua, alu agai...o la ua fai le... ua uma ona eli Samusu, o la o le a alu i Amaile. Ua foi mai Lalomanu le alu a le suavai, o le manava o le eleele e aumai ai le suavai lea, o lea ua feinu uma ai le itumalo. E faafetai atu i le Ofisa Sili o Pulega o le Vai ma la outou Pulega o lea ua maua si suavai o lenei itumalo. Aua o tala lava ia sa i ai le Afioga i le Taitai o le Malo ma Minisita, talu lava ona fealuai Iesu i Isaraelu ma nuu paia i la aso, ua feoai foi nai tagata Saleaamua i uta ma le matou itumalo, ae le i maua lava se suavai. Ae faafetai i le tausaga na tea nei, ua ola le matou suavai, o lea ou te talanoa i nuu a uta, a o tai ua leva ona i ai le suavai. O le agaga faafetai lea i le Pulega o le vai, malo le galulue, faafetai foi faamalosi.

E faafetai foi mo la outou lipoti, aua o le isi vaega lena e pei ona saunoa ia Faaulusau, e sao lelei lava. Aua tou te mafatia lava i le matou okika aua e aumai a outou tupe e faaletonu, e uma ona auiliili uma e le Komiti nei. Ae malo faafetai le onosai, e sao lelei lava le saunoaga a Faaulusau.

O le EPC, ua leai se tama o Tologata, ae faamanuia atu i le CEO fou, ua le manatua lou suafa, faafetai lava. Sa tatou feiloai... faafetai lava i le afioga i le tupufia, faafetai Faumuina, faamanuia atu i lou tofiga fou, malo lava le onosai, e sao lelei lava Faaulusau.

E faapena foi i le Pulega o le uafu ma le taulaga. Ua uma ona ou talanoa atu i le Fesootaiga, tautuana tatou telefoni, faafetai foi i le afioga ia Ah Sam ma Mata'u, malo Tala faafetai lava mo le agalelei, faafetai mo mea uma. Masalo ua... sa ia matou le Fuimu ma le Ofisa o le Faatonutonu, Regulator, e momoli atu foi le agaga faafetai i le vaega lea, te i ua pau ia te au, aemaise lava Matagaluega uma a le Malo.

O le tatou Koviti-19, faafetai, faapea ua galo lau Afioga i le Minisita o le Soifua Maloloina, e leai, e le galo lava le faigata o le galuega. Ua uma ona lauga ai le toatele o sui usufono, ae na ona faapoopo atu lava, le agaga faamalo ma le faafetai. Ua mau foi lou tulai mai e faafeagai ma nei faafitauli e tele, e leai ma se mea o faapopoleina ai le atunuu. E pau lava le mea, fai ma logo logo mai, aua o le mea lea e i ai matou, e fesili mai o matou itumalo. O le a se faalogo i...se i tatou faalogo masalo e sau i news nanei le poloaiga malosi a le Malo. Ae faafetai lava malo le onosai.

Ona ou oo mai lea i le... o le mea mulimuli lea, o tatou alavai, masalo e tasi lea mea faaleaga auala. E pei o le mea tele lea a le matou Komiti e fai, o le matou o e vaavaai solo le mea e toa ai le vaivai tulou, matou te o e vaai le mea e le o i ai se alavai. Na iu lava ina matou tusi i le konekarate lea e faia le tatou auala i le malaevaalele. E o atu le matou asiasiga e leai ni mea o eli i le autafa i ina i talaatu o Toamua, ou te le manatua po o fea lena mea... e lata i Faleula. Ona fai lea o lea o le matou tusi, aumai le tali a le vaega, o la

ua faatino. Ia faafetai Galumalemana, ai o e silafia le mea lea ou te talanoa atu ai. Aua o le mea taua tele lea, e leai ma se aoga o se auala e fai, ae leai se alavai e faia. Aua e a? Aua na ona timu lava, aemaise la pe a faapea e faatu i lalo le alu a le mea, ae piopio le auala, e motu la le auala lena, e mautinoa lava e motu. O le mea lea e tuualalo atu ai, e le o matou o ni insinia, o le poto masani lava, ua masani i le asiasi soo, asiasi soo. E momoli atu ai le agaga faafetai ma le faamalo, i vaega uma ia.

E masalo ua tau faaiuiu atu, ou te le iloa pe o i ai ma se isi mea o misi. Ioe o lea la se i ou faaiiu atu i le matou itumalo... O le faafetai i le matou aoga, Kolisi o Aleipata, o lea ou te tusia, faafetai ia Lautafi, ua uma oe Lautafi. O paaga mai fafo, o le malaetaalo, o lea la ua ou oo mai i ai. O le matou malae taalo, o le manaia ia, faafetai i le Malo mo le \$50,000, manaia foi lea faasoa a le Kapeneta, ave tai \$50,000 i le nuu e fuafua ai e latou le malae. E pei ona saunoa le Palemia i le taimi o Minisita o Tupe, e fua le tele o le pelaue i le tupe e maua. O le ie foi lele e fai ai le pelaue. O lea foi la sa fuafua le matou malae i le \$50,000 na avatu, ae avatu masalo e pei lava o le tele o le fale lenei le mea na tanu ai. Ae momoli atu ai le faafetai i le konekarate, o le a le tau atua le igoa o le konekarate na faia le matou malae, e na o le kuata la ua tanu. E masalo pe afa mita le alu i luga, pe 1800 le maualuga, na o le kuata le mea la ua tanu. Na ona faaoo atu pea i luma o le Minisita ma le Minisita Lagolago mo se isi taimi o i luma. A aulia lea paketi, faaopoopo ifo sina mea mo le matou malae faamolemole e tau faamaeaea ai i Vaisuli. E masalo o nai mea ia na ou tusitusia i lalo. Ae o le matou malaevaalele e pei ona ou fai atu, o le popolega sa i ai, o lea ua ou maua nei le tala o Peseta sa i vaega e fai ai lokeki ma mea na. A o le mea la e popole ai, afai na mu le vaalele la na lele i luga e le i atoa se itula talu na alu ae mu, ne i te i ua land se vaalele, faaletonu i le matou auala ae leai e le masalosalo i le konekarae. E faafetai i lau Afioga o le sa vaaiia le matou fai auala o le matou malaevaalele, ua matua manaia lava le matou malaevaalele.

SUI FOFOGA FETALAI: Ia malie le sui usufono o lo o saunoa se i tuu atu le avanoa i le Minisita o Galuega Tetele a le Malo.

Susuga Hon Papaliitele Niko Lee Hang: Faafetai i lau Afioga mo le avanoa. E le fia faalavelaveina le saunoaga matagofie i le Afioga i le sui usufono. Ae leaga o lea ua talanoa mai i le malaevaalele, e ese lava lokeki ese le malaevaalele. Aua e te popole, o le lokeki lea na pa, e le tutusa la le fausiaina o lokeki, a o le malaevaalele o la e seki lava le tatou malaevaalele, aua e te popole. Faafetai.

SUI FOFOGA FETALAI: Ia malie le sui usufono se i tuu atu le avanoa i le sui usufono mo Anoamaa i Sasae.

Afioga Alaiasa Muagututi’a Moefaauouo Malagaitutogiai Sepulona Moananu: Talu ai ona o lea ua saunoa le sui usufono i se faaopoopoga o le malae taalo. O lea ua ou faamaumaua leaga o lea e le o afio mai le Afioga i le Minisita. O le mea foi lea e leaga ai le saunoaga a Peseta, e pei ua tau lavea ai le Minisita fua le lē auai mai i le taeao lenei. Ae o lea o le a ou faamaumauina uma le talosaga a le Afioga i le sui usufono mamalu. Faafetai.

SUI FOFOGA FETALAI: Ia faafetai i le sui usufono e pei ona saunoa nei le Sui Minisita o le Matagaluega o Aoga, e lelei foi ona ou faailoa atu, ua oo mai i le Nofoa le faanoi a le Minisita o Aoga, ona o le tulaga o lo o auai i se maliu. O se toe sauniga o se tasi o lona aiga. O le mea la lea ua ou manatu e tatau ona faailoa atu, leaga o lea ua saunoa i ai le Sui Minisita. O le ala lena o le le nofoia o le Nofoa, ma ua i ai foi le faatagaga mo lona le auai mai i le Fonotaga, ona o nisi o fuafuaga taua.

A o lo o ou i ai pea i le avanoa lenei, ona o le tausiga lava o tulaga mamalu ma le aloaia o Taulumaga o le Fono Aoaofaitulafono a Samoa. I le tulaga o tatou lauga, e fautuaina ai foi sui usufono mamalu, ona o le taua o suafa. O le mamalu o Pulega a le Malo e faapea foi i Faalapotopotoga Tumaoti. O le agaga masani ma tatou Tulafono Tumau, ona e ui lava o lo o molimoli i le tulaga o le faafetai, ae ao foi ona tatou puipui i tulaga ia. Ae agai sao a tatou lauga i le Minisita e fitoitonu i ai le Matagaluega, a i ai se mea e fia saunoa ai, o ia e saunoa i le tulaga lea. Ae ua silafia e le Atua le afusisina o Ofisa Sili o Pulega o Matagaluega a le Malo, e faapea foi Faalapotopotoga. O se fautuga mo le aloaia o tatou Tulafono Tumau Tumau. E avatu ai le fautuga ma le faaaloalo ina ia tausia pea e sui usufono. Ou te tapa lau Afioga i le sui usufono mamalu mai Aleipata Itupa i Lalo, ia tulai mai e faaauau e le o toe umi foi sou taimi.

Ia tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Faafetai. O lea ua oo tonu le lauga a le sui usufono mamalu mai Aleipata Itupa i Lalo, i le tulaga sa masani foi ona ou laga i Fonotaga ua mavae. O lea foi sa saunoa le Minisita i le malaevaalele. E tasi lea o atinae a le Malo, o le taua ia ona o le malaevaalele lea e i ai nei, e 1400 mita le umi la ua i ai. E toeitiiti lava, e toe 500 mita le faaopoopoga ona mafai lea ona tu laueleele i ai le 737. O lea e tasi le tatou malae vaalele, e latalata mai foi Tutuila, e manaia pe a faauma pea i le tulaga e tatau ai, ona avea ai le malae vaalele i Tiavea, o se tasi o malae vaalele faava-o-Malo i vaalele lapopoa ia. Ma lou faaaloalo lava.

SUI FOFOGA FETALAI: Tulai mai le Afioga i le Tuiatua Faanofonofa e faaauau lau saunoaga.

Afioga TAFUA MALUELUE TAFUA: Ia faafetai lava i le sui usufono mamalu mo le faauilavea, ia faafetai foi i le faamalosiau a le Minisita Lagologo aemaise le Minisita o Galuega le Afioga ia Papalii le Susuga i le Papaliitele. E pei o le autu lava o lou manatu i lenei taeao lau Afioga i le Fofoga Fetalai, vae atu le faafofogaaga a Samoa. O le tatou aganuu ia faataua, ae alu i luga o le faaloalo ma le ava, tu ma aganuu, ae faavae i le alofa, fusi i le alofa. O lea e musumusumu mai ia Gatoloai e vaai le alofa i galo. Ou te le iloa la po o la... fai mai Gatoloai e alofa mai ia te au po o le mea e tataua ona kiliva atu le alofa i luma o a outou afioga. Ae faafetai lava faamanatu mai, e sao lelei lava Snow White.

E toe momoli lava le agaga faafetai ia Olo, le purinise o le tatou Komiti, faapea foi e sa i ai, o si tama o Laauli, o Faumuina ma Tapusatele, ae le gata i lea o le paia ma le mamalu sa gasolosolo atu i le Komiti. E tasi lava si mea lea lau Afioga i le Minisita o Tupe, se i tau silasila lelei ifo pe le mafai, e le o le taimi nei se i uma le faamai. E pei ua tau maualuga foi le excise tax o le 8% lea sa sii o tatou meaai suamalie, ou te le iloa pe i ai se mafuaaga na faaopopo ai, pe o le soifua maloloina lava. E pau lava si au tuualalo, mo basics lea e i ai le alaisa moa ma le suka ma le falaomata, o nai mea na e tausi ai le atunuu. Aua a mafai ona pau i lau Afioga le Minisita o Tupe Maua, ia faafetai. E na o se tuualalo, e leai sau aia i le tiute e pule lava pe tuu i le 100%, ae na ona ou tuualalo atu, le affordability o le mamalu o le atunuu. Ou te le iloa te i ua misi ia au, ia sorry lau Afioga i le Minisita o Faamasinoga, o Tulafono ia e 3 ua mavae atu, sa fesiligia au e le lou itumalo, po o le a sou manatu i ai. Sa faavae lava lou manatu e tolu vaega na ou taua i ai.

O le vaega muamua o le faataua lea o tu ma aganuu e faavae i le faaloalo ma le alofa. E le gata i lea, o lea e maua foi i faamaumauga, faafetai i lau Afioga, e pau lava lea o sau saunoaga ua matua ou viia ai lau Afioga i le Minisita, o lou faamalamalama o tatou Tulafono ia e 3. E moni lava au, na tautino lava e polofesa o Davidson ma Aikman, i lenei vai taimi o fai le soalaupulega o le Tulafono. Na tautino ai lava, i le le malamalama o laua i tu ma aganuu a Samoa, o lea foi lava na i ai ma le quotation po o le tala na faapea mai. Faataatia mo le lumanai, a le lumanai lea ua tatou i ai, lea na e saunoa i ai, faafetai. Ia faafetai i lou tala manino mai o faamaumauga ia e manino ai tatou. E i ai foi le malosiaga o ia Tulafono ma o Tulafono lava a Samoa e alu alu lava, iu na faatuatua Tulafono a Peretania lea sa tatou mulimulitai i ai, atoa ai ma Tulafono a Niu Sila ma Ausetalia. E momoli atu foi le agaga faafetai i lau Afioga, o le matua manaia lava o le faamalamalama. O lau lauga sili lava lea o lea ou te nofo ma au, a o lea ua ou maua le saunoaga a Tofilau lea na ou fai atu ai i le aso 23 o Novema, fai mai lava le saunoaga a si alii. Faataua tu ma aganuu a Samoa e faavae i aga faaloalo ma le alofa. Leitioa a musumusumu mai le tamaitai lea i le alofa aua

o i ina e teu ai le filemu moni mai i le Atua. O le saunoaga lea a si alii a o Palemia i lana faamavaega, lauga faamavae.

Ae o le 1960 lea na ou taua ai le polofesa Aikman ma Davidson, lea lava la e manino i lou manatu, ua oo mai le taimi e faatino ai le Tulafono. Ua lauga ai nisi ua ou musu e toe taea le tulaga lea. Ae faafetai i le Komiti, maeu foi lo outou tautiga maeu lo outou taumafai. Faafetai i le Taitaifono o le Komiti lea, ia e pei ua outou faatuina foi se matatia fou i le tatou Palemene i le tatou Nofoaiga. Amuia foi outou, amuia outou ua outou faaauauina le tatou Tulafono ia ma uiga lava ia o nei a mea o Faavae fai mai nisi e alalaga lava.

O le matou nuu latou e lauga soo lava i latou i le talaluma fai mai o le Faavae lenei o le nuu o le Faavae lenei. Ou taofia loa, aua ne i ou toe faalogo i se toeaina o lauga i se Faavae, o le mea lena e le pule ai outou e pule ai au. Lona 2, o le Faavae, e sii sii faatasi lava le tu ma aga, ma aga i lea taimi i lea taimi, sosolo ai le Faavae. O le uiga lena o le Faavae, e le faapea o le Faavae ia na faavae mai lava i le papa ma le oneone i na aso fale o lea lava e o ai tatou ua leva ona fai piliki ma mea o sima ma le oneone. Ioe, o le eseesega lena, aua ana fai la e tuu pea, ia faapenei lava e le o iloa le mea e i ai tatou. Ia ae e pei o se tamai rationale lena o lou mafaufauga na ave i lo matou itumalo na ou maua ai le agaga e lagolagoina ai le Tulafono.

Ia o nai mulugaveve ia, sasaa atu foi le... fai mai le lauga a le isi toeaina na ou faalogo ai i inei i le Palemene, a omai o le a fai le aleaga, ia ona sasaa mai lea o le faiva ma tufatufa atu. O si au tamai aleaga lena lau Afioga i le Fofoga Fetalai, ae malie e tuu mai sina avanoa se i ou pai atu lava i si ou itumalo, ia ona faauma ai lea o sau tala. E i ai se isi mea...

SUI FOFOGA FETALAI: Faaauau le saunoaga a lau Afioga i le Tuiatua faanofonofu.

Afioga TAFUA MALUELUE TAFUA: O lo matou vaa e fau tele, e fai ma tuualalo mai nai ou uso. Ae lau Afioga i le Fofoga Fetalai ana faapea e mafai ona faataga mai au e le Alii ou te faia ni apaau, ua ou faia ni apaau a lau Afioga, e te lele atu ai i luga.

Ia o lea o le a lau atu faalupega o le matou nuu lea o Satitua, ioe, ia a faalogo mai ia lau Afioga Faliuila, ia ou te le i vaai lava ia oe o lea o le a oo mai le palota e te le i sau lava e fai se ta tala. Afio mai la alii Faliuila ma lou soata o Teo. Afio mai le Faasisina o Lesa ma Lesa, lea na omai ananafi lau fanau Lesa. Susu mai Aiga e Lua, o Usu ma Seupule, maliu mai oe le Faleatua, ia ma upu ia te Oe Leatitua Faiga.

E maua foi lenei taimi e momoli atu ai le agaga faafetai ma le faamalo i tapuaiga ma tatalo a Susuga i Faifeau ia Mitai ma Folia, faapea foi Vaituu ma Palale, Vaisaili Toafa, ia faapea foi le Susuga i le Tiakono ia Ameto ma Pesio. Ia aemaise le Susuga i le Tausi Matagaluega i le Metotisi. Malie lau

Susuga i le Feagaiga e tasi lava le ta fetauiga ou le manatua ae ou te iloa e poo lou ao. Ia, e molimoli atu le faamanuiaga i lau Susuga i le Taitai Matagaluega aemaise si ou faletua. Ia e tutusa lava ta ulu e poo uma lava.

O Mutiatele ma Malaela, ia o le a faatalofa atu i lo tatou nuu, Afio mai le Paia o Alalamalae, Afio mai Laupola ma le Toalima, Laupola o le Sao Fetalai, ia o le Toalima o Aiga lea o le a ou lauina atua o Mase, o Toa, o Ena, o Anae ma Saomai. Ia Afio mai lo outou Tama o lo o Saota, o le faalavelave o le Saota o le Valasi o le Afioga ia Tuisila, o lo o ia train ina tagata foi ia o le All Blacks i Niu Sila. Ae faafofoga mai Tuisila, vili mai i lou aiga e palota mai ia au. Ia Afio mai Oe le Vaafauese, o le Tama o le Faasuaga ai i lau Matua o le Solosolo i Savili. Afio mai Tuitogamatoe, o Oe o le Faauluuluga o le Aiga Salevalasi. Ia Afio mai foi Fagasoaii o le Alo o le Tuiatua, Afio mai Lesa ma Tauanuu ma Luamanuvae, Afio mai oulua o Alii o le Fono ma le Nuuoti ma le Tamasifuata, ia maliu Siu ma le Afolau ma le mamalu ia te oe Saleaamua.

Ia e na o le toa 2 lava faifeau o si tatou nuu, 3 ia o lau Susuga i le Toeaina Faatonu o Timoteo Momoemausu, ia ma le faletua ia Sa, a oulua faafofoga mai, ua ou maua lava le tala faapea o oulua ua tau avaga i le FAST. Ia ae tautuana, toa pea le tai. O lea lava e lelei si a si a tatou Pati lea e i ai. Na ou faatalofa atu ai lea i le Susuga i le Ekalesia Mamona, o le Epikopo lea o Faletoa Poni, ia ma si ona faletua o Lelilio. A o sese le igoa o si ou faletua ia, faamalulu atu ia e alofa atu i si loomatua.

Oo mai lea ia Saleaamua, ia Saleaamua ia maliu mai Leifi ma Tautoloitua, mamalu mai Le Nofoaluma ma le Nofoapule, maliu mai Anasili, ia ma i latou e ou le nuu. Maliu mai le Tanaeseese ma le Lautinalaulelei ia te Oe Saleaamua, ia ae faapea foi ma le Tuiatua.

Faatalofa atu lea i le Susuga ia Pati Vili ma Matalena, o le Toeaina faaolioli. Ia le Susuga ia Soo o le Epikopo ma Talele, ia faapea foi le Susuga i le Faifeau Aso Fitu ia Esera. Ia e faamulimuli si au uo pele lea o le matou Tiakono o Faamanu ma Leu. Ia talosia ia oulua omai i lenei vaiaso e fai ia se tatou feiloaiga ma fai se tatou lotu.

Ia oo mai loa i si ou nuu o Utufa'alalafa aua o le Matautia sa i i, Afio mai lau Afioga i le Saopapa Matautia, o e faalogo mai manatua ia le ta palota. Afio mai le Saopapa Afio mai Fanene Fuaialii, Afio mai Ifopo ma Seumalu, ia faapea foi le Matuaoa. Maliu lau fetalaiiga Leteu ma upu ia te Oe Saleaamua.

Ia ona ou oo mai lea i le tatou ala'alafaga ia Samusu, Afio mai lau Afioga ia Tago ma le Aiga Satago, Vaotogo ma Foutanu maliu mai lau fetalaiiga Amoa, o Oe o le Matua, o Oe foi o le Tane o le Itu. Maliu mai le Nofo a Vaega ia te Oe Samusu ia ma upu ia te Oe Faleatua. Ou te faafeiloai atu foi i Susuga i Faafeagaiga, ia Manuele Samusu, ia faapea foi Solomona o le Tiakono o le Katoliko. Ia ma le Susuga ia Lolesio o le alo lea o Tuiloa lea sa sui usufono ma si ona faletua. Ia vaai o le HRPP e tatau ona tu ai oe

Lolesio, aua e te alu ia Sua lena e alu i le Tautua. Ia faafeiloai atu foi i le Susuga ia Talia ma Ruta, ia faapea foi le Susuga ia Nukulaelae ma Tuasivi. Ia Nuku aua e te popole se i ou alu atu ma avatu sau taseni i le weekend.

Ia ona faaiu atu ai lea ia Amaile ma Tiavea, ia Afio maia le Tamaaiga i lau Afioga Mataafa, Susu mai le Matua o Tauiliili, Susu mai Leusoalii, Afio mai Alotutusa o Mataafa Tupuola, Afioga ia Fonoti ma Faasuamaleaui, Afio mai Tamapaa ma Leota, Tuimaseve ma faapea ma Luamanuvae. Alala mai Oe le Aualuma o Fonoti, ia faapea foi ma le tatou Tiakono ia Iakopo ma le faletua.

Ia e faaiu e le faaitiiti le taua o le tatou nuu Tiavea, Afio mai Tuiavii ma Leusoalii, Susu mai Valai ma le Taauso Seiuli, ia Susu mai foi le Maopu ia Sua, Maliu mai le Faleulu Lautinalaulelei Faleupolu, maliu mai le lua Nofu Falelua ia Fiu ma Malaesala, ia maliu mai oe Saleaamua ma Lefagoalii.

Faatalofa atu ia Andy, Akenese o le AOG, faapea foi le Susuga i le Sea ia Ioane Tupo ma le faletua, ia e le gata i lea o isi faifeau ua ou le maua suafa e faamalulu atu. Ae molimoli atu alofaaga, ia seia oo se aso ona avatu lea o se pusamoa ma se mea pe a maua ma le agaga faaaloalo.

Ia lau Afioga i le Fofoga Fetalai, atonu o nai alofaaga na e molipo mo si ou itumalo. Ae o lenei itula e momoli atu lava le agaga faafetai ma le faamalo i le onosai mai o lau Afioga, ona o tatou e matasau faatasi, ae mulivai eseese. E ese lava le tafeaga e ese lau o le tafeaga, ese foi si au tafeaga. Ae ou te faaiu atu ai faapea, ae maia le tai e lelei, solo mai mauga o lafulemu, to mai le ua o faamanuiaga Samoa, ia manuia lou alo atu i faiga filifiliga, soifua.

Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Aleipata Itupa i Lalo.

SUI FOFOGA FETALAI: Ae le i faia se faafetai ma se faamalo i le sui usufono na saunoa, e lelei ona ou toe faamanino atu le tuua ai e le Afioga i le Minisita o Aoga o lona nofoa, o lo o fai ma sui ia o le tatou Malo i le tuua ai o le Malo e le Susuga ia Sua Saini Le Mamea, sa fai ma avefua i le Manu Samoa, ia sa tau foi mo le atunuu. O le ala lea e ao lava ona faailoa atu, le faafofoga a le Palemene, ia o lo o susu atu le Susuga i le Minisita o Aoga ma Taaloga, e fai se molimau ia mo lea foi tama tautaua, sa tautua i le atunuu e ala i lana Manu Samoa.

O upu lava a le atunuu e pau mai lava le talo matua ia e toa ai le moa. O le lauga faatoeaina lea ua faafofoga i ai Samoa, faafofoga i ai le Palemene, aemaise o si ona itumalo o Aleipata Itupa i Lalo. Ia e momoli atu le faafetai tele, e le tau faafuluina lava le pasina ia. E le tau sulaina foi le toga memea. O lea ua e saunoa faatama, o le agaga lena e faataua le aganuu e ala i le alofa ma le faaaloalo. O le upu moni e tau i loto, e tau i lagona e tau i ivi ma aano ma mea o le ute lea o faigamea. O fea lava e feasuai i ai Tulafono ma... ae

fusi lava, e apelepele e le aganuu e ala ai ona faataua le Malo Tutoatasi o Samoa lana aganuu e pei ona i ai le saunoaga i lenei aso.

Ia tau ia ina faafofoga le Atua ma faafoi le Viiga i Le Alii ona o le tamaoaga o mafaufauga ia aua le feagai i tiute ma le valaauina e ala i tofi filifilia o le itumalo o Aleipata Itupa i Lalo. Faafetai tele, malo sauni. Ia o lea ua...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

SUI FOFOGA FETALAI: Ia se i tulai maia le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Sa i ai se mataupu taua lava na laga e le sui usufono i lana saunoaga, afua mai i le galuega tele sa faafeagai ma ia ma le Komiti e iloiloina lipoti nei mai i Matagaluega. Na taua ai lea o le auala lea na ala mai le fesoasoani, o le isi foi lea ituaiga fesoasoani mai i malo i fafo o tatou paaga ae e le o se mea sa masani ai. O lea e faalupe o le Budgetary Support.

E i ai le talatuu i le auala lea o se mataupu sa faigata tele ona talia e tatou paaga ia faapena foi ma isi foi Malo aemaise lava o fesoasoani e aumai i atunuu tau atiae. O lea la e faaigoa o le Budgetary Support, o le ituaiga fesoasoani e faaaua mai e faatupe ai le Tala o le Tupe. Ae o le talatuu i le mataupu lenei, o le tausaga e 2000 ou te manatua lelei le masina o Me, na tupu ai ia le fouvale faasaga i le Malo o Fiti. Fouvale a le vaegaau, na lafotuina ai le Malo ae amata mai i totonu o le Palemene. O le o atu o fitafita amata mai i ina le lokaina o sui usufono i totonu o le Palemene ae tutu mai fitafita i le faitotoa.

O i ina atoa lava na le taunuu ai le faamoemoe o le Pasefika, e sainsi mai i nei le Pasefika le maliega sa faaigoa o le LOME 1, LOME 2, LOME 3, LOME 4. E tai 5 tausaga mai i le 1975 o le amataga lena o faigapaaga a Malo o le Pasefika ma le Karepeane ma Malo tuufaatasi mauoloa o le Malo o Europa. O lea sa faaigoa o Maliega i LOME, o le laumua lena o le Malo lea o Toko, i le taimi lena pulea faavaegaau. O le Lome 1 la, sa ma malaga ai ma le sui usufono le Minisita o Sam Sails e sainsi ia le Feagaiga lea. O au o le Official a le Malo, a faasolosolo mai ai lea o fesoasoani, uma lea 5 tausaga toe fai le maliega faaigoa lea o le LOME 2. LOME 2 lena, lea na aumai ai seleni amata loa faaleleia ia tatou vai taumafa seia tau mai lava i le taimi lenei. O lea foi la e afua ai tane tetele ia e i i Siusega, ia ma tane tetele ia e i Savaii i Vailoa. E auala mai la i totonu o le faalapotopotoga lea a Europa.

O le taimi nei ua ova ma le 30 le aofai o le Malo o Europa, ae 79 le aofai o Malo o le Pasefika, Karepeane faapea foi ma ACP Carribbean Pasefika ma Aferika. O le taua la o le mea lea sa faapea o le a saini mai, o le a tau ai faatoa usuia lava lea o se fono tele faapenei i totonu o le Pasefika. Sa matou faia ai le negotiation a o avea la au ma... i le 1999 ma spokesman po o le sooupu mo le Pasefika atoa. Na matou uunaia ai lea ina ia saini mai i le Pasefika, a o le laumua po o le atunuu e sainia ai, o Fiti. E na o Fiti e maua ai ia lava faletalimalo, e mafai ona omai ai ia latou nei e toatele, na o le saini lava o le feagaiga. E leai lava nisi mea e na o le omai lava saini loa ma le feagaiga.

Ae te i loa ua oo i le Aso 20 o Me, tusa pe toe 3 masina saini loa, ae oso loa la le mea lea o le fouvale a le militeli, sui atoa ai loa ma le faaiuga, ave loa saini i Aferika. Ae o lea la e tau o le Cotonou Agreement o le laumua lena o Benin i Aferika, o lea la e alu ai lava ia le Feagaia lena mai i le 2000 i le 2020 uma loa le 20 tausaga, o lea la o le a toe saini le isi Feagaiga Fou ma ua... o anapo o le ta o le 3 na taunuu mai ai le faasilasilaga, o lea o le a faataunuu le faamoemoe mo le isi 20 tausaga e saini mai i Samoa i le lona 2, o lona uiga o se vaitaimi mai ia Iulai ia Tesema o le tausaga nei.

O lea la ua ua fai le iuga lena. O le iuga na fai muamua ae o lea la ua toe faamaonia ona o lea faatoa maea ona faatalanoaina ia le Agreement po o le Maliega lea. Ae na fai le faaiuga ia Iuni tua atu o le tausaga lea na tea nei, i le malaga na ma o faatasi ai ma Fiamme, ona afio lea o le Sao Faapito e auai i le fono lea ae ou agai i Aealani i le fonotaga tele a le lalolagi a Asosi o le lalolagi e pulea po o le fono tele e pulea lakapi.

O lea la ua aumai anapo le faaiuga, o le a faataunuu ia le sainiga lena i le afa lona lua o le tausaga nei. Ua ala la ona ou taua le mea lea, ona o le masina i le Aso 20 o Me ae oso loa le fouvale lea i Fiti, le taunuu loa. O mea tetele na na tupu i le tausaga lea 2020, o le fouvale o le Malo o Fiti e le latou militeli, ma le fouvale o le Malo o Solomona, ua pule faasoloatoa ai ia pagota. Ua breakout po o ua sosola ese mai le falepuipui, ona omai loa lea laga uma i luga mo mea o auupega, o lea la ua pulea e pagota le Malo, ua feoi solo foi lea ma auupega, e tusa ua anarchy, ua leai se Malo. E tele tagata na fasiotia e pagota ua pule faasoloatoa pagota, o lea na mafua ai ona usu loa le fono, o matou o Taitai ma ave ai loa le fesoasoani, faatu mai ai loa lea ma faiga fou lea, amata mai i Solomona, a tupu mai le faalavelave, ua tapena loa Malo o le Pasefika ma fai loa le iuga e ave le fesoasoani taofi ai faiga faafoumalo, ia ma le puipuiga i totonu o le Pasefika.

Ia o lea la sa o ai tatou leoleo, amata mai i le tausaga 2000, lea na o ai tatou leoleo, o ane ai fitafita a Niu Sila, Fiti ma le Pasefika e o e ave le fesoasoani i le Malo lea o Solomona. Ua pulea e tagata fouvale, ia ma toe ta ta mai ai i totonu o le moa o le ala o upu fai o Malo, lea la ua faamuta ua toe tulai mai ia le Malo o Solomona, ua toe i ai le Pulega i le Malo, ae e tele la le sao o Samoa, ona o tatou leoleo ia sa avea ma vaega o le puipuiga o isi nuu na

avatu a latou fitafita ona e i ai le latou army, e tai pei o Fiti ma Toga a o tatou na o leoleo.

Ae o le fonotaga la i le tapenaga o mea ia, sa usu ai le matou fonotaga ma talatalanoa ai i Ausetalia, ma talanoa ai loa ituaiga fesoasoani e tatau ona aumai i Malo. O le mataupu la lea na laga, na laga e tatou, e a pe a faaauala mai ia outou fesoasoani, fesoasoani i le faatupega o Tala o le Tupe. Na matua teena le mea lena, teena ona e le o se mea e masani ai, ona o le tulaga e pito sili lea ona faigofie, e Malo e faaoga sese ai ia latou seleni. O le faaauala mai e faatupe ai ia latou Tala o le Tupe ona e ese ai ma ituaiga fesoasoani e aumai faapitoa mo se atinae tele, e tai pei o le atinae lea e fausia o le auala laupapa i Maliolio po o le auala laupapa i i Vaisigano. E matua patino lava le mea e aumai ai tupe, e tala tala malie mai foi latou... ina ia aua lava ne i faaoga sese.

Sa malosi lava ia le tatou aveina o le mataupu lea, fesoasoani mai i le faatupega o le tatou Tala o le Tupe. O le afuaga o le faigata, ona e le o i ai se latou sao, i totonu o le tapenaga o le Tala o le Tupe. E mafai lava la ona aumai pule ai le Malo, e pei o mea e tutupu foi i isi Malo aemaise lava Aferika. E auala mai faapea, ae sue atu e le o faatinoina i auala na aumai ai, ae ua ese mea ua faatino ai.

Ua leva la o taumafai Malo i le faiga lea, ae sa teena, teena e le tele o Malo. Ae o le taimi nei la, ua pei se faatauina o se aisakulimi le mea lea ua i ai. Ua faigofie, ua faigofie ona aumai i le tatou Malo, ae afua i se a? E afua o lea ua iinei o latou sui, ua i ai ia latou sui i totonu o Samoa, ia ma e tilotilo foi i latou i le faaoga tatau ina ma o matamata i faatinoga o Paketi nei, ma latou molimauina ai ia le faaoga tatau o seleni o aumai nei. O lea la ua pei o se mea foi lea o se mea faigofie. Ia na ona faaulu lava o le Paketi, ia ave le fesili e i ai se tou fesoasoani? Sau Ausetalia o le a avatu le fia miliona lea, e lagolago i le tou Tala o le Tupe.

Lau Afioa i le Fofoga Fetalai, o lea ua avea e pei o se mea foi lea e tupu pea, tupu pea, tupu pea, o le ala lena o lea na ou avatuina ai, e i ai ona tala tuu, ona tala faasolopito e le i faigofie ona aumai. Ae e mafua ona aumai, ona e faatuatuaina i latou o lea e aumai le tupe ma faaoga tatau aemaise lava ia tama fanau a le atunuu, o lea e faalagolago i ai o le lima taumatau o le Malo, i le faatinoga o lea Matagaluega ma lea Matagaluega, i le Ofisa Sili ma le vaaiga a lea Ofisa Sili o lana Matagaluega, ia ma le Minisita o lea e faamalumalu mai i ai, e fai ma refer i ai mataupu, aumai le latou tomai faale-tagata faigaluega, tuu faatasi ma le tomai o le Minisita e malamalama i mea o lo o manaomia e tagata i tua. O le Minisita, o le sui usufono ua masani i le faagaioiga o mea nei o atinae i nuu i tua.

O le taua ia o le itu lea, ma o le itu foi lena, e faataua, ia faataua ia le aufaigaluega a le Malo, e le faapea e na o lou nofonofa i i le Matagaluega, fai ma o i tua, afai ai ni a outou igoa matai, o i tua, o i tua e vaavaai i le faiga o le ava o lauga o mea faapena, ma le faasoaso mai e tamalii o le nuu ma

failauga o latou mafaufauga, e limataitaiina ai le nuu, faatino lelei ai ia fuafuaga a lo tatou Malo.

O le itu lena e taua tele ai le tofiga o Sui o le Malo, ia ma se i tilotilo, a o atu e mua ia feiloaiga, fe ai le ava, fai le ava. Ia e i ai le taimi na faatoa ou sui usufono ai, sau lea o le isi sui usufono fai mai se ta o lava i le matou nuu ta o ta eva ai. I le taimi foi lena ua ou saoloto, ia ona ma o lea. Ae o atu, o le asiasiga... ae usu loa le nuu. O lea la ma te o atu, e i ai la le Official lea na matou o, e na ona toso mai lava o le fala foi lea toso mai ai le ava, ae ou tilotilo atu i le Official, ua sola. Ae o le faigofie ia, a toso mai po, folafola le ava.

E i ai foi la le isi Sui Ofisa Sili o le isi Matagaluega o Aoga, na o i le mea faapea. O le tagata o le matua maoae, o le Suafa matai lea e a foi... e umia. E na ona toso toso mai lava o le fala foi lea e aumai ai le ava, e leai lava se isi e poina ia tuu loa e le tama lea e sau, tuu loa i luma i i. O lona uiga, o ia e folafolaina le ava. E na ona tilotilo atu lava i le ava, tilotilo i lana iputi lea e inu, vaai atu o lea e pe le lago i totonu o lana iputi. Na ona ea ae lava i luga fai mai lava upu, ua iputi pe lago le tatou taeao.

Lau Afioga i le Fofoga Fetalai, o le taua ia o le mea lea. O lea ua faafogafoga mai outou, a fai fonu a outou nuu o i tua, o i tua e aoao ia outou folafola ava. Ia alu atu ia tou asiasiga, ae tupu ai foi se mea faapena amata i le iputi pe lago.

Lau Afioga i le Fofoga Fetalai, ia o si au faamalamalamaga lena o le tatou Paketi i lenei taeao.

Afioga Hon Afamasaga Lepuiiai Rico Tupai: Lau Afioga i le Fofoga Fetalai...

SUI FOFOGA FETALAI: Malo saunoa i lau Afioga i le Taitai o le Maota, ia ua tatou lalata i le faaiuga o le tatou galuega, ia ae tuu atu le avanoa i lau Afioga i le Minisita o Fesootaiga.

Afioga Hon Afamasaga Lepuiiai Rico Tupai: Ia faafetai i lau Afioga mo le avanoa, tulai atu ma le faaaloalo e manatu e i ai si mataupu lea sa laga e le sui usufono mamalu i lana saunoaga. Sa ou mafaufau se i faatoa tali atu ai i le vaiaso fou, ia e leaga e alofa o lea lava e alu le seleni a le Afioga i le sui usufono mamalu i lana saunoaga, sa ou mafaufau se i faatoa tali atu i ai i le vaiaso fou, ae leaga e alofa o lea lava e alu le seleni a le Afioga i le sui usufono mamalu. Ae manatu foi e i ai nisi o tatou o lo o faapena ona lavea ai i le tulaga lea. O se molimau atu i lenei taimi i le tulaga o le tau o fesootaiga ua i ai nei, o le mea moni e le o se tala e ave ane ai, o Samoa ua aupito sili ona taugofie i le Pasefika i le tulaga o le tau o fesootaiga ua i ai nei.

Ae ou te manatu o lea ou te tau faalogologo atu i le saunoaga a le Afioga i le sui usufono mamalu, ia ai o lea e pei e foliga mai na o le faatau lava o le credit ona faaaoga sao lea. E i ai le tulaga lea e faaaoga e fale telefoni e faatau lau credit ona e tago lea fai ai lau bundle. Ia o le faa-Samoa o lea mea, o le mea foi lea e tuufaatasi ai lau kegabytes, o au minute, o au text. O le tele lava la foi lele pe na o le \$11 e alu ai, ae alu lava le vaiaso atoa o faaaoga. Aemaise lava la ia tatou lea e faaaoga telefoni foi nei saveu, smart phone ia po o le telefoni poto. Ona e vave la le... o le mea lea ua tupu, ua alu i lalo le tau o le faaaogaina o le telefoni, a o le faalavelave lea e i ai ua saosasoa tele le fesootaiga. E pei o le mea lea e tupu nei i luga o alatetele, o lea ua taumafai le Malo foi lea e toe tau fai patupatu i luga o le auala, ona ua matuao saosasoa le o o taavale ua i ai ona o le lautele o le auala. O le mea la lea ua tupu, ua lautele le paipa lea e faaaoga i fesootaiga, ua o i le atoa, ua masau lava le saosasoa o fesootaiga lea ua i ai pei e vave ai la lau faaaoga, e pei e foliga mai e... ae o le fautuaga, se i toe silasila ifo lava la tatou uma i le... aemaise foi le faafofoga mai a le atunuu i le mea la lene o le bundle. E taugofie la le mea lene mo tatou, e alu ai lava le vaiaso atoa po o le 14 aso foi o faaaoga lau \$11 ia fuafua i ai lau faaaoga. Afai foi ua faigata ia tatou ua matua le soifua ona fai mea ia i luga o le telefoni. E tatalo atu foi ua masani ai le fanau e fesoasoani ane mo tatou, aemaise la pe a tofafa i le po, ia e tatalo atu, o le isi lene mea o lea e tupu, o lau telefoni lea Smart Phone, e te tofa lava a o la e alu lava le faaaoga o le telefoni i tua, o le background lene ona o la e ola au apps. E i ai la le ki lene e i luga lene e i ai au data le mobile data, ia ona e tago lea e tape. Tape la le tama lene, a e tofa la i le po ae o la e i ai lau \$2.1sene, e te ala mai lava i le taeao e \$2.1sene lava lau seleni la e i ai. Ae faafetai. Ou te manatu, e faafetai atu i le sui usufono mamalu, e le o le taimi muamua foi lea ua faafetai mai ai i le Matagaluega o Fesootaiga aemaise i TV i tua ia matou ma telefoni. Faafetai tele lava i le amanaia o le auaunaga Tafua.

Ae ou te toe fia faaopoopo atu lau Afioga i le tulaga lea na saunoa i ai le Afioga i le Palemia, o lea tou te faafofoga mai nei o le 3 i le vaveao lea na maua ai le tonu foi o lea tala fiafia mo Samoa, aua o fonotaga nei e matua faatumulia tatou faletalimalo, faatumulia le tatou atunuu i tagata mai fafo pe a faapea ua toe tatala alavaa. A o le mea lea ou te taumafai atu, ia, ta te ofo i le Afioga i le Palemia aua o le Fono lea na amata mai le 12:00 i le vaveao ae uma nei i le 4:00 a o lea lava e alaala mai i le tatou Fonotaga. Faamalo i lau Afioga i le Taitai, manuia vaega o totoe o lenei aoauli. Faafetai.

SUI FOFOGA FETALAI: Faafetai. Ia, se i tulai mai lau Afioga Tafua e saunoa.

Afioga Tafua Maluelue Tafua: Lau Afioga i le Fofoga Fetalai, e leai, e momoli atu foi le agaga faafetai i lau Afioga mo lou avanoa ou te faafetai ai

i le Minisita, faafetai tele lava. Ia masalo lava au ai sa fai sau miti, tulou lava, ua ou oomia ai la le mea ae tagi mai le tagata i totonu o le telefoni. A o lea la ua ou malamalama nei, faafetai lava. O lona uiga o le mea lena o le bundle, a. Ia sa ou faapea lava na uma le bundle i le taimi o le kerisimasi. Ae ui o lea, faafetai lava mo le faamalamalamaga.

I lea lava nota lau Afioga, ua maua foi le avanoa se o si au faafetai puupuu lava i si ou aiga, e pologa lava, e maua mai tupe ma mea e fai ai le palota, ia ua maua lena avanoa, o lea ua fetau lelei lava ma lou taimi. Ia, si ou itumalo ma si ou aiga, e le tau faafetai atu, o lena tou te iloa le mea e tataua ona fai, faafetai lava. Faafetai mo mea uma. Faafetai lava i si ou tuafafine la e i Liverpool, ia pei e tele tupe a le vaega lena, o la e Sea ma le Sea lea o Faanu. Tautuana e lafo mai se tupe e fai ai le palota ne i te i ua galo. Faafetai atu foi i nai ou uso ma tuafafine, aiga uma lava, aemaise si ou itumalo. Ia, se i oo i se isi aso tatou talatalanoa, ae faafetai lava le lagolago mai, faafetai mo mea uma, agalelei le Atua ia foai le malosi. Soifua.

SUI FOFOGA FETALAI: Ia, se i tulai mai lau Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, leai na o si mea lava sia, na ala ona ou tu atu, ua uma ona ou tu atu ona ua uma le lauga a le sui usufono, a o lea ua toe lauga faalua. Ae na ona faamanatu atu.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, pe maua sina minute laitiiti.

SUI FOFOGA FETALAI: Ia, na o sina faafetai lava ai ua galo lona aiga i fafo, ae le afaina lea. Ia, se i tulai mai le sui usufono mo Falealili Sasae.

Afioga Fuimaono Teo Samuelu Teo: Faafetai, o lea ua maea foi le faalauiloa a le Afioga i le sui usufono. O le tulaga o le faamalamalamaina o le vaega lea i tatou bundles na o se tuualalo faamolemole lau Afioga i le Minisita pe mafai lava ona toe tagai ane i ai. O package ia e aumai luga lea e te filifili ai i bundles e manaomia le faaaogaina, ona o la e vaevae mai lava e latou o minute, o data e faaoga, o le mea e alu i vaega eseese, ae a e manao lava oe ia e kiliki e i ai lava se mea, a e manao na o le data lava e te faaoga po o le netfix na o le netfix po o le a le isi vaega, a o le faalavelave, a uma ona e alu e oomi le bundle, e te le iloa o la e ua uma ona vaevae mai le vaega lea, ona e manao lea e faaoga ai lava na o se isi vaega laitiiti lava, a ua maumau atoa lava isi mea aua e uma loa aso ia e limiti mai ai, tiai atoa isi data na. A o le mea, e tataua lava ona maioio lelei vaega e agai tonu i ai le faaoga a sui taitasi. Na o se tuualalo e le fai ai lau Afioga, ia ma tau

faataugofie laitiiti. E moni o lena e fai mai saunoaga ua taugofie tatou, a o lea ou te fai atu, e taugata. Ioe ma le faaaloalo lava.

SUI FOFOGA FETALAI: E taua le finagalo. E lelei ona faamanatu atu i lau Afioga i le Minisita, se i e tali i ai i le taimi foi e te tali ai, leaga e le i saunoa ai le sui usufono. O lea la ua toe tupu lagona, ia e pei lava o upu masani, e tutupu a matagi i liu o vaa, ae tapena lelei lau Afioga mo le taimi foi e te tulai ai ina ia aofia ai, aua e taua le mea lea, e taua.

Tofa Lealailepule Rimoni Aiafi (Faleata Sisifo): Lau Afioga, na ona ou fesoasoani atu lava i le sui usufono aua e le tau tali le Minisita i sui usufono faapea. E lua mea e i ai, o le bundle ma le bundy. Ne i te i la ua faaoga e le uso le bundy, ae i ai le mea e tau o le bundle. Faafetai.

Afioga Fuimaono Teo Samuelu Teo: Lau Afioga i le Fofoga Fetalai...

SUI FOFOGA FETALAI: Malie le sui usufono se i alaala mai i lalo. Ia se i saunoa po o le a foi le mea lea e te fia...

Afioga Fuimaono Teo Samuelu Teo: Leai, o le mea lea na taua e le sui a Minisita, e leai se mea faapea i luga o le polokalama a le telefoni. Ae afai o i ai se mea faapoo faapena, ia ta te alofa i ai ne i te i ua toe oo i ai. Ma le agaga faaaloalo.

SUI FOFOGA FETALAI: Talu ai ona o lea ua tatou taunuu i le faaiuga o tatou galuega o lenei aso, e i ai le agaga o le Nofoa e fia molimoli atu le agaga faafetai tele. O le upu moni e tulaga ese lenei aso i le matau ma le vaavaai. Atonu e faapena se silasila ma le maimoa mai a le atunuu, le tausi mamalu ma le tausi va, a o auro ia. O le mea lea e le mafai ona tuua e le Nofoa, e ao ona ou faailoa ma tau atu le agaga faafetai ua sologa manuia le tualumaga o tatou Fonotaga i lenei aso. Ia, o le agaga lea, sa laualuga le tulaga o le avafatafata o le alofa ma le faaaloalo e pei ona saunoa i ai se tasi o sui usufono matua o le Maota. Ia faaauai ai. O le tatou Fonotaga o totoe, o le agaga maualuga lea.

E momoli le faamalo ma le faafetai i sui usufono filifilia na lautogia foi o lenei aso, malo le tapena, malo lauga. Ua faafofoga le atunuu aemaise nai outou itumalo a o le Palemene o Samoa. Ia faamanuia le Atua. Na pau lava o lea, le paia e o le Palemene ma lau faafofoga Samoa, ia, e pei lava o upu masani, so o se faiva e sii e le asa ma se maumau, e i ai foi aleu o le Nofoa. Ua avea foi le naunau ina ia tausi a tatou Tulafono Tumau, ia e faapena lava, ma mea e paopapa i la outou faafofoga. Ia, fale i le fale o le Atua lo outou finagalo, tuli i luma lo tatou ai aua se manuia o si o tatou atunuu. Ia manuia

le Palemene i lo outou alo atu ma aga atu i aiga o lo o tapuai mai, ia i ai le agalelei o le Atua.

Lau tapuaiga Samoa aemaise le afaigaluega tofofi a le Atua, ia mana la outou lauga, mana la outou tapuaiga e manuia ai si o tatou atunuu ma ana atinae.

Ia o le matou tala lea, a o le i tolopoina le tatou Fonotaga o lenei aso, ou te valaau faaaloalo atu i lau Afioga i le sui usufono tamaitai o le itumalo o Gagaifomauga Nu.3, manaia le lauga o lenei aso, faaiu mai le tatou Fonotaga i se tatalo.

Na tolopo Taulumaga a le Fono Aoaofaitulafono i le itula e 1:00 i le afiafi seia aulia le Aso Faraile, 05 o Fepuari 2021 i le itula e 9:00 i le taeao.